

# EPISTOLÆ

RESPONSORIÆ DUÆ

A

THOMA SYDENHAM M.D.

PRIMA

*De MORBIS EPIDEMICIS*

Ab Anno 1675. ad Annum 1680.

A D

Amplissimum, Doctissimumq; Virum

ROBERTUM BRADY M. D.

Collegii Cajo-Gonevillensis Custodem, nec-  
non Regium in Medicinâ apud Cantabrigienses  
Professorem longè celeberrimum.

SECUNDA

*De LUIS VENEREÆ*

Historia & Curatione.

A D

Ornatissimum, Eruditissimumque Virum

HENRICUM PAMAN M. D.

Collegii Divi Johannis Cantabrigiensis So-  
cium, Academiæ Oratorem Publicum, & in Col-  
legio Greshamensi apud Londinenses in Medicinâ  
Professorem.

---

L O N D I N I :

Typis M. C. impensis *Walteri Kettilby*, ad Insigne  
Capitis Episcopalis in Coemeterio D. *Pauli*, cl<sup>o</sup> cl<sup>o</sup> clxxx.

1. 100 210 3

100 100 100 100

100 100 100 100

100 100 100 100

100 100 100 100

100 100 100 100

100 100 100 100

100 100 100 100

100 100 100 100

100 100 100 100

100 100 100 100

100 100 100 100

100 100 100 100

## *Clarissimo Viro*

THOMÆ SYDENHAM, M.D.

**N**emo uspiam Medicorum, Vir  
eruditissime, adhuc vim aeris  
& influentiam in humana cor-  
pora attentè perpendit, nec in vita no-  
stra perennanda quas agit partes eorum  
quispiam consideravit satis, viresque quas  
exerit in fermentando, alterando, &  
circumducendo sanguinem, aut in moti-  
bus animalibus quibuscunque peragendis  
cujus sit energiae, & efficaciae horum non  
aliquis notavit; neque ejusdem temperi-  
em naturalem, alterationes multiplices,  
& mutationes, quas Constitutiones  
haud perperam indigitas, ne leviter qui-  
dem, vel Medici, vel Historiae Natura-  
lis

lis Scriptores attigerunt, multo minus perscrutari sategerunt. Fieri sanè nequit, cum in omnes corporis partes, etiam reconditissimas, aer sese insinuet, quin quas subit alterationes & mutationes à rebus quibus impregnatur easdem sanguini & succis communicet, & imprimat; unde ut plurimum ab hac vel illa prava aeris constitutione oritur hujus vel illius indolis prava sanguinis Diathesis. Optimo itaque consilio Observationes Medicas circa morborum acutorum historiam & curationem juxta varias annorum & eorundem partium constitutiones instituisti, cum in iisdem, aeris actiones in sanguinem, succos, & spiritus præsertim (si ipse non sit spirituum materia) conspiciantur. Et nullus dubito quin Februum indoles ab annorum temperie in quibus grassabantur observata utilissimam, si non unicam, methodum constituit ad praxim stabiliendam. Perge itaque, & si quæ adhuc restant Observationes Februum

annorum nuperrimè elapsorum, fac ut palàm fiant, quâ in re quàm maximè humani generis salutì prospicies.

In Sectione prima, Cap. quinto, libri tui, paucis egisti de usu Corticis Indici, & ejusdem exhibendi methodo. Equidem scio quosdam haud infimi subsellii Medicos, qui in magnâ quantitate & dosi sæpius repetitâ eum exhibent; alios item qui ex eodem extracta, infusiones, & ex infusionibus julapia, & emulsionnes conficiunt, quibus modis se non tantum Intermittentes, sed & continuas quasdam certò curare affirmant: Magnum procul omni dubio in curandis Intermittentibus est remedium. Ego quidem per 20 plus minus annos dictum Corticem variâ forma & multiplici præparatione maximo cum successu exhibendum curavi. Si verò peculiare quippiam de usu hujusce Corticis nosti, vel quid melius progrediente experientia fueris edoctus, id ne graveris precor in lucem proferre.

*In curatione Rheumatismi frequentem Phlebotomiam, & larga manu celebratam tanquam necessariam proposuisti. Quererem Ego annon rejectâ tam severâ & crudeli methodo, alia non humani sanguinis adeò prodiga, nec minus certa inveniri possit. Dum hæc agis, Dignissime Vir, malevolorum jurgia, & invidorum stigmata atque calumnias sat superque persenties; neque nunc minùs quàm olim nomini tuo aut famæ parcent, licèt ingenuis ferè omnibus displiceant, & candidioribus, apud quos solenne est istiusmodi detractores despicere. Isti verò, si Febrium historiam longo usu comprobata, vel earundem essentias, causas, & differentias, vel veram tandem Medendi Methodum expiscari volunt, Te Ducem & viam præmonstrantem sequi necesse habent; cùm vix, aut ne vix quidem, alia, vel earum naturam investigandi, vel curandi vario possit assignari. Maçte itaque esto, & sperne sciolorum diçteria;*  
*since-*

*sincerorum hominum ingenia excita; tu  
methodum monstrasti; & si tua non  
placet, qui carpunt dent politiozem &  
magis firmam. Vale, Vir Integerri-  
me, qui hisce peragendis totam medico-  
rum turbam meritò devincies, inter reli-  
quos verò,*

Tibi jure meritoq; amicissimum,

R. BRADY.

Cantabrigiæ,  
Decemb. 30. 1679.

---





*Amplissimo Doctissimoque Viro*

ROBERTO BRADY. M.D.

*Collegii Cajo-Gonevillensis Custodi, nec  
non Regio in Medicinâ apud Cantabrigienses Professori longè celeberrimo.*

**M**E certè, Vir Humanissime,  
si quid in morborum curatione profecero, ad omne id cuius efflagitanti impertien-  
dum præcæteris qui nunc sunt homines facillimum esse omnino par  
est: si enim ea tantum mihi inno-  
tescant quæ & reliquis mortalibus,  
(quod mihi plus satis constat) nullo  
pacto mihi obfuerit levidensia ista  
& è triviis desumpta evulgare; sin  
autem affecutus sim aliquid quod è  
re Medica sit, & ad certio rem mor-  
borum Therapeian faciat, non tam

mihi laudi dabitur, quàm aliis daretur quibuscumque, ea in lucem expromere; Qui & à Podagra jam ab annis plus minus triginta, & Calculo diu malè multatus, facilè mecum reputo quàm seriò gauderem si quod meis malis levamen aliorum indicio possit afferri. Cùm autem paucissimis ingens illud privilegium à Deo Opt. Max. concedatur ut publico commodo hâc in re inservire queant, iisque tantùm quibus è *meliore luto* quàm mihi *finxit præcordia Titan*, votis agendum est, quod reapse effectum dare non satis est virium: Semper enim existimavi, neque id sine ratione, majoris esse felicitatis certam vel levissimam alicujus morbi debellandi methodum agris mortalibus prodidisse, quàm vel *Tantali*, quod ajunt, vel *Cræsi* thesauros accumulasse. Feliciorem hoc illum dixi; dicam & meliorem,

liorem, sapientioremque: quod enim  
uberius & sapientiæ & bonitatis suæ  
specimen quis potest edere, quàm  
cùm se è communi generis humani  
naturâ decisum animadvertat, ea  
quæ molitur omnia ad publicam  
magis omnium utilitatem, quàm  
ad suam ipsius, qui tam exilis toti-  
us particula & contempta res est, ju-  
giter referre? *Ut enim* (loquor cùm  
maximo illo dicendi sentiendique  
magistro Cicerone meo, sui sæculi,  
ne dicam universæ hominum natu-  
ræ Genio) *leges omnium salutem sin-*  
*gularum saluti anteponunt, sic Vir bonus*  
*& sapiens & legibus parens & civilis*  
*officii non ignarus utilitati hominum, plus-*  
*quam unius alicujus, aut suæ consulit.*  
*Cicero de fin. bon. & mal.* Quinimo  
fatis liquet quòd cùm facinorosi sit  
hominem jugulare, boni viri erit  
eundem vel conservare, vel alios iis  
instruere præsidiis quibus adjuti eum  
ab

ab interitu vindicent, etiam authore vitâ jam functo. Et vox illa planè inhumana & scelerata audit eorum qui negant se recusare quò minus ipsis mortuis terrarum omnium deflagratio consequatur.

His autem impræsentiarum mis-  
 sis factis, fatendum est debere me  
 ea quæ de his morbis, de quibus  
 percontari libuit, animo volutavi,  
 ut ut exilia, tibi planè aperire, Tibi  
 inquam Eximio Viro, & Sparta  
 quam ornas dignissimo; cujus ego &  
 eruditioni & probitati, animiq; can-  
 dori ea tribuo encomia quæ reliqua  
 Togatorum Gens, inter quos nites.  
 Prætereo etiam quantum tibi debeo  
 gratiarum, quòd te tam malè habe-  
 ant immerita illa quibus à non nul-  
 lis proscindor convitia; de quibus  
 hoc habeo dicendum, quòd si vita  
 innocua hominis, qui neminem neq;  
 facto neque dicto læserat, me ab il-  
 lis

lis sartum tectum reddere valuisset, nunquam in me detonuerant. Cùm autem nullo id meo crimine evenerit, neque, ut spero, eveniet unquam, stat sententia non me ideò plectere quòd alii deliquerint; id tantùm ratus ad me attinere ut viri probi scilicet officio defungar, & boni Medici, quantum patitur tenuitas nostra.

Morem itaque geram in tradendis observationibus quæ mihi in morbis, de quibus sciscitabar, occurrebant. Primùm autem agam de *Febribus Intermittentibus* nunc apud nostros Epidemicis. Quo nomine non abs re fore arbitror annos istos ordine sed breviter percurrere, qui illum excipiebant quo claudebatur *Historia Acutorum Morborum* (qualis qualis illa demum fuerit) qui per præterlapsos annos 15 grassabantur, & quædam obiter perstringere in eorun-

rundem curatione à me pridem notata. Quo facto meliùs innotescet quo tempore & quibus gradibus quæ jam obtinet Febrium *constitutio* nobis obrepserit.

*Annus*  
1676.

Annus 1676. eosdem peperit morbos quos genuerat *Constitutio* prostramo loco commemorata in dictis *Observationibus*, viz. Annor. 1673. (in cuius Autumno ea se primum exeruit) 1674. & 1675. At verò exolescente fermè hâc crasi, inferiores erant quàm pro suo genio qui subpullulabant morbi, & minùs insuper Epidemici; non obstante peculiari ejus anni indole, quantum ad manifestas aeris qualitates, quibus ab annis præcedentibus perquam abludebat; cùm & æstatis fervor, & frigus hyemis omnes fermè annos quorum memoriam habemus longo intervallo superaverint. Et cùm tam ingens tempestatum

tum discrepantia similes tamen morbos produceret, satis hinc liquet non tam manifestam quàm occultam aeris temperiem Epidemicis morbis favere. At verò fatendum est morbos eosdem quoad symptomata quædam aliquando à manifestâ aeris diathesi pendere, quod & *Morbilli* & *Cholera Morbus* hoc anno invadentes testatum faciunt; de quibus breviter agam.

*Morbilli* enim nascenti anno coorti, licet non admodum Epidemici, id tamen eximii habebant quòd solito longiùs procurrerent: nam cùm pro more suo mense primùm Januario comparentes, ad Æquinoxium usque vernum ingravescerent, dein paulatim imminuti cum Solstitio æstivo ferè expirarent, hoc anno ad Æquinoxium fermè Autumnale pertingebant, ab æstatis calore, nisi fallor, aucti viribus quò diutius obisterent.

sterent. Neque tamen Methodum Medendi ab usitatâ illâ diversam postulabant.

Exeunte æstate *Cholera Morbus* epidemicè jam sæviebat, & insueto tempestatis calore evectus, atrociora Convulsionum symptomata eaque diuturniora secum trahebat quàm mihi priùs unquam videre contigerat. Neque enim solùm abdomen, uti aliàs in hoc malo, sed universi jam corporis muscoli, brachiorum crurumque præ reliquis, spasmis tentabantur dirissimis, ita ut æger è lecto subindè exiliret, si forte extenso quaquaversum corpore eorum vim posset eludere.

Quamlibet autem hic morbus non aliam à jam receptâ medendi rationem sibi vendicabat, Anodyna tamen fortiora, eaque sæpius ingerenda quàm alias solebam, omnino indicabantur. Ex. gr. Ad quen-  
dam



dam vocatus per id temporis truculentissimo illo, quod modò descripsi, symptomate tantum non enectum (me autem comitabatur *Carolus Goodall* M. D. cujus animi Candor, Probitas illibata, summus in me amor, labor improbus in morbis dignoscendis curandisque unà cum nomine mihi semper occurrunt) & enormi vomitione, spasmorumque violentiâ, animum agentem, cum sudore frigido, & pulsu vix micante, 30. guttas *Laudani Liquidî*, à me jam olim publicati, in cochl. 1. *Aq. Cinamomi* fortis exhibendas curavi, veritus sc. ne vehiculum paulò copiosius medicamento rejiciendo (quod in vomendi tam impenso conamine persæpè fit) ansam daret: dein lecto assidens quasi ad semihoram, & expertus Remedii vires nec Vomituritioni compescendæ, nec sedandis Convulsionibus adhuc pares esse, toties

toties illud ipsum repetere, & dosin in tantum augere cogebar (interposito tamen spatio, ut quid à jam ingesto mihi foret sperandum priùs ediscerem, quàm novas adferrem suppetias) donec tandem pervicacissima illa symptomata sub jugum victoris mitterentur, quod tamen vel minimo corporis motu excitata denuò excutere satagebant. Serio itaque imperavi, ut & corporis quieti modis omnibus indulgeret ad paucos dies, & Medicamentum jam dictum, sed in minori dosi, subinde assumeret, etiam postquam convalesceret, ad ἐνεξίαν sc. confirmandam; quod nobis ex animo cessit.

Neque est cur me quispiam justo audaciorem pronunciet, eo sc. nomine quòd tantam Laudani Liquidi vim ægro infundere non dubitaverim; cum judice experienciâ certò constabit, quod in quibus affectibus

bus ex Opio parata indicantur (sunt autem tres *Vehemens Dolor, Vomitus vel Dejectio enormior, & insigniores spirituum animalium ἀταξία*) in iis & Remedii Dosis & repetendi vices cum symptomatis magnitudine omnino sunt conferendæ. Quæ enim dosis remissiori symptomati coercendo par est, ea ab alio fortiore superabitur; & quæ aliàs ægrum in manifestum vitæ discrimen conjiciet, eundem impræsentiarum ab orci faucibus liberabit.

Atque hi sunt morbi isti qui hoc anno populabantur, iidem sc. ut jam innui, cum morbis trium annorum præcedentium. Quales autem fuerint qui annum sequentem viz. 1677. funestaverint, non habeo dicere. Cum enim molestissimo sanguinis mictu, à motu vel levissimo, sub anni initio malè multarer, neque ità diu postea Podagrâ etiam,

*Annus*  
1677

quæ non jam tam artus quàm viscera sævissimo dolore excruciat, accedentibus insuper virium & appetitûs prostratione, crurum tumore, aliisque symptomatis non minùs periculosis (Quem, si tùm fuerim extinctus, mors certè non tam à bonis quàm à malis abstraxisset, haud equidem repugnantem) me domi meæ ad menses tres continere, deindè redintegrandæ sanitatis causâ per idem ferè spatium rusticari cogebar: Autumno reversus ad meos, Febres Intermittentes hinc inde sparsas esse (quarum tamen pars maxima ægros non in urbè primùm invaserat) ab amicis didici; cùm autem mihi per valetudinem non liceret ægros invisere, de hoc anno nihil melius silentio possum adferre.

*Annus*  
1678.

Proximi anni (viz. 1678.) *Constitutio* prorsus immutata *Febribus Intermittentibus* (quæ jam ab anno 1664. ad

ad tredecim sc. annos, urbe ferè exulaverant, nisi quod nonnullos sporadicè occuparent, vel ex agris fortè comitarentur) usque adeò favebat, ut Epidemicæ rursus audirent; neque eum tantum gradum hodiè tuentur, quin & fines latiùs proferent, donec hæc, à quâ pendent, aeris *discreto* suam *amplum* attigerit. Quantumlibet autem dictæ Intermittentes pauciores aliquot etiam tempore Verno fuerint adortæ, eo usque tamen exeunte Æstate & Autumno subeunte præ cæteris sæviebant, ut nulli ampliùs morbo Epidemici nomen relinquerent. Hyeme verò paululum fatiscentes *Variolis* locum cedebant atque aliis insuper Epidemicis, qui per omnia dominabantur, donec Intermittentibus apta tempestas in orbem rediret.

Sed ut jam edisseram quæ de harum Februm & naturâ & causis se-

dulâ observatione affecutus sum: imprimis notandum est, quòd licèt olim *Quartanæ* frequentius occurrerent, nunc dierum aut *Tertianæ* erant aut *Quotidianæ* (nisi quis postremas has *Duplices Tertianas* malit appellare) & pariter quòd licèt *Tertianæ* *Quotidianæ*que aliquando cum rigore atque horrore invadentes, subsequente primùm calore, mox etiã sudore, tandem in omnimodâ ἀμυξία desinerent, atque post statam periodum ægros de novo lacerarent; ne hunc quidem jam morem servabant ultra tertium quartumve Paroxysmum; maximè si æger lecto addiceretur, & assumptis Cardiacis calidioribus oleum camino, quod aiunt, addiderit. Postea verò Febris hæc eò usque etiam præter indolem suam incrudescibat ut *Intermissionis* loco *Remissionem* tantùm ægro concederet; & magis indies ad

Conti-

*Continuarum* speciem accedens, tacto Cerebro, tandem haud paucos extingueret.

Hic autem loci affirmare libet, me ne unicam quidem Febrem per hos dies verè Continuam vidisse unquam, nisi fortè re malè gestâ in earum classem fuerit evecta; vel una esset *Intercurrentium* mihi dictarum, quòd sc. omni ferè anno invaderent. Ita pertinaciter hæc Constitutio hujusmodi Intermittentibus favebat; cujus certè acies priùs est retundenda quàm Continuæ epidemicè grassari fuerit integrum. Etenim in hac Febrium specie Natura plùs satis festinare videtur, & agendi vehementiâ justo citiùs tempora materiæ morbificæ subigendæ, mox etiam despumandæ debita percurrere: Quod in *Depuratoria* secus accidit, in quâ non nisi post dies 13. vel 14. apparent signa Materiæ Febrilis tan-

dem concoctæ, per sudores subinde, vel potius per *διαιρούς* paulò pleniorē eliminandæ.

Curationem quod spectat; jam à multis annis mihi innotuit quàm sit periculosum eam in Tertianis & Quotidianis (quæ cùm recentes sint nullumque typum indutæ in continuitatis vicinia adhuc hærent) per sudorifica moliri: quamvis enim notissimum sit simul cum sudore prorumpente inquietudinem atque alia symptomata statim evanescere, & ἀμυγεῖν succedere, & ex consequenti huic paululum esse indulgendum, saltem non esse obsistendum Paroxyfmo fatifcente, tamen est compertissimum quòd si justo copiosius eliciatur sudor, quæ intermittebat Febris jam fit Continua, ægerque tanquam incerto alex casu in vitæ discrimine versatur, hic servatur, perit ille. Ratio est hæc, nisi mea me fallit



fallit conjectura, quòd sc. istiusmodi profusus sudor, cùm materiæ febrilis, paroxyismi calore eo usque evectæ ut jam per despumationem ejici possit, modum exuperet, exterminatâ eâ parte quæ unico Paroxyismo respondet, de reliquo sanguini incendendo impenditur. Hujus itaque methodi inefficaciam, & aliarum evacuationum, Venæ sectionis v. gr. & Catharseôs, incommoda (quarum utræq; relaxando totum sanguinis morbum protrahunt) dum mecum perpenderem, *Peruvianus Cortex* certissimam mihi spem fecit; de quo verè affirmare possim, non obstante tam vulgi quàm perpaucorum è doctis præjudicio, me nihil mali ægris accidisse ab ejus usu vidisse unquam, vel cum ratione suspicari potuisse. Et profectò si tam effectorum durationem quàm ipsius innocentiam exploratam haberem,

berem, principem illi locum inter omnia quotquot sunt remedia deferre nullus dubitarem; cùm non tantùm in hoc morbo insignium esse virium deprehendatur, sed & in Uteri & Ventriculi etiam affectibus: Tantum abest ut de ejus insalubritate meritò quis conqueratur.

His autem potissimùm de causis, nisi fallor, dictus Cortex malè audit. Primò quia plurima illa horrendaq; symptomata quæ Febres Intermittentes jam diutiùs ægrum cruciantes comitantur, etiam ubi ne minimum quidem Corticis degustaverit, Cortici, vel semel assumpto, imputantur. Secundò quia cùm occultâ vi & non per sensibilem aliquam evacuationem morbum averruncet, statuunt plerique materiã morbum committentem quæ propelli debuerat, tanquam hostem intra mœnia vi Corticis astringente inclusam latere,

tere, novos daturam tumultus, atque ægrum non penitus evasisse cùm adhuc catenam trahat. Ast hi non satis attendunt Sudores paroxysmum finientes id omne quod in lucido sanitatis intervallo accumulabatur prorsus eliminasse, manere tantùm morbi seminium tempore maturandum; quodque Cortex fugientem paroxysmum à tergo urgens, & intercepto qui debuerat subministrari morbi commeatu sive fomite, non potest in sanguine retinere quod jam in illo non nisi tanquam in embryo reperitur; ac proinde neq; strangulationum neq; obstructionum quæ vulgò objiuntur, reus est peragendus.

Quo autem pacto deprehendemus Corticem vi suâ astrictoriâ Febres fugare? Qui id probare velit necesse erit ut priùs alia Astringentia pari virtute prædita in medium afferat; mihi certè vel eorum fortissima

tissima adhibenti in experimentum nondum è voto cessit. Quid quod illos etiam sanat qui ab ejus usu tanquam à Cathartico assumpto (quod nonnullis accidit) frequenter alvum deponunt? Id verò demum est rectè sapere suo se quemque pede ac modulo metiri. At si quis fucum sibi faciens, aliis se præditum esse facultatibus existimaverit, quàm quæ inserviunt percipiendæ vel *Naturali Theologiæ* (ut Deo sc. rerum omnium Architecto & Moderatori debita veneratio cum profundissimâ animi prostratione jure merito exhibeatur) vel *Philosophiæ Morali* (ut virtutem exerceat, & mores tam ad privatum quàm publicum Societatis Humanæ bonum accommodet) vel denique *Arti Medicæ, Mathematicæ, vel Mechanicæ*, (quibus vita communis adjuvatur.) Hic primùm Hypothesin aliquam è schola *Naturalis Philo-*

*Philosophia* depromat, quâ vel unicam differentiam specificam rerum in naturâ possit enodare; ex. gr. rationem reddat quare *Gramen* omne viridi ubicunque colore, nusquam alio cernitur infectum, &c. Hoc si effecerit in ejus castra haud invitus transeam; sin aliter, non verebor dicere quòd Medici cura omnis atque industria in expiscandâ Morborum Historiâ, iisque remediis adhibendis quæ, *Experientiâ* *Indice* ac *Magistrâ*, eosdem valent depellere, debent collocari, observatâ tamen istâ Medendi Methodo quam recta ratio (non speculationum commentis, sed trito & naturali Cogitandi modo innixa) ei dictaverit. Dicam itaque paucis quod usu didici de Methodo quâ Cortex nobis usurpandus venit.

*Cortex Peruvianus*, cujus *Pulvis Patrum* vulgò nomine insignitur, annis abhinc quinque & viginti (si bene

nè memini) apud Londinenses nostros in exterminandis Febris Intermittentibus, maximè Quartanis, primùm cœpit inclarescere. Idque optimo sanè jure, cùm hujuscemodi morbi rarissimè ab ullo alio sive Remedio sive Methodo Medendi antea expugnarentur, unde etiam opprobria Medicorum & erant & audiebant. At verò non ita multo tempore elapso, duabus de causis, non quidem levibus, damnatus in desuetudinem prorsus abiit. Primò quia paucis horis ante adventum Paroxysmi, pro recepto id temporis more, exhibitus ægrum nonnunquam è medio tolleret; quod & civi cuidam Londinensi eidemque Senatori Urbano, *Underwood* nomine, & Capita-neo nomine *Potter* in vico vulgò dicto *Black Fryars* Pharmacopolæ memini accidisse. Funestior hic pulveris exitus, quamvis oppidò rarus, medicos

dicos tamen paulò cordatiores ab ejus usu meritò retraxit. Secundò quia æger ope pulveris à Paroxysmo alias invasuro liberatus, quod plerumque eveniebat, tamen intra dies 14. recidivam ut plurimum pateretur, in morbo scilicet recenti, necdum temporis cursu suoque Marte committigato. Maxima pars hominum his permota rationibus spem de hoc pulvere jam pridem conceptam protinus abjiciebat: Neque enim tanti æstimabant Paroxysmum ad paucos dies protelare, ut se eo nomine in vitæ discrimen à pulvere intentatum induci paterentur. Ego verò jam ab aliquot retro annis haud vulgarem hujus Corticis vim seriò perpendens, animoque revolvens, non alio magis quàm hoc Herculeo medicamento Febres Intermitientes debellatas iri confidebam, si qua par erat cura accederet;

& diligentia. Diu itaque multumq; apud me agebam ut & *Periculo* à pulveris usu impendenti, & *Recidivæ* intra paucos dies subsecuturæ (quæ duo erant amolienda incommoda) possem occurrere, atque ægrum hujus ope ad perfectæ sanitatis gradum promovere.

Primò *Periculum* quòd minitabatur non tam ex ipso Cortice natum arbitrabar, quàm ex eo quòd minùs opportunè ægro ingereretur: cùm enim visingens materiæ febrilis diebus à Paroxyfmo vacuis in corpore fuerit aggesta, pulvis prædictus, si immediatè ante Paroxyfimum deglutiat, facit quo minùs materia morbifica ipsâ naturæ methodo, Paroxyfmi scilicet impetu, possit eliminari, quæ proinde præter fas inclusa ægrum in vitæ discrimen solet conjicere. Hoc ego me malum propulsare posse existimabam, materiæque



æque pariter febrili de novo generandæ obicem ponere, si ubi primum Paroxysmorum unus affligere desierit confestim pulverem exhiberem quo infecuturus sufflaminaretur, & diebus Intermiſſionis ſtatis ſubinde vicibus eundem repeterem uſque dum nouus invaderet Paroxysmus, atque ita paulatim tutoque proindè ſanguinis maſſam ſalutiferâ Corticis virtute penitus inſicerem.

Secundò cùm *Récidiva*, (quæ intra dies 14. plerumque accidebat) ex eo mihi videbatur naſci quòd ſanguis non ſatis exaturaretur virtute Febrifugi, quod utut efficax, unâ tamen vice morbo penitus exterminando par non fuit, idcirco autumabam nihil ad eam præcavendam æquè poſſe conducere atque methodum repetendi pulveris, etiam devicto ad præſens morbo, juſtis ſemper inter-

intervallis, antequam scilicet vires præcedentis dosis prorsus elanguescerent.

His Itaque rationum momentis innixa mens eam, quâ jam utor, mihi methodum dictabat. Ad ægrum *Quartanâ* Febre laborantem accersitus (die Lunæ v. gr.) si Paroxysmus eodem die sit invasurus, nihil prorsus moveo, sed id tantum ago ut spem faciam eum à proximè venturo liberatum iri. Ac proinde binis diebus Intermiſſionis (Martis sc. & Mercurii) exhibeo mane, & serò Corticis subtilissimè triti ʒii. vel in Vino hauriendas, vel in formâ Electuarii cum Syr. è Rosis siccis q. s. superbibendo Vini haustum. Die Jovis, quo metuitur Paroxysmus, nihil impero, cùm ut plurimum nullus accedat, reliquiis materiæ febrilis per solitos sudores præcedentem paroxysmum absolventes despumatis, ejectisque

ctisque è sanguine, atque intercisâ novæ mineræ vel fomitis accumulâ-  
tione repetito pulveris usu diebus  
Paroxysmos determinantibus adhi-  
biti.

Verum enimverò nunc morbus de-  
nuò recrudescat (quod è prædictis  
incommodis erat alterum) die Septi-  
mo à quo postremam dosin æger  
assumpsit eandem præfati pulveris  
quantitatem (si sc. in partes quatu-  
or divisam) eâdem quâ prius me-  
thodo, certo certius exhibeo. Quam-  
vis autem repetita hoc modo semel  
Medicatio persæpè morbum confi-  
cit, non tamen prorsus in tuto col-  
locatur æger, nisi Medico tertio  
quarto ve eandem methodum eodem  
temporis intervallo iteranti parere  
non gravetur; maximè ubi sanguis à  
prægressa aliqua evacuatione fuerit  
debilitatus, aut se æger incautiùs au-  
ræ frigidiori ferendum exposuerit.

D Verum

Verùm etsi hoc remedium nullâ purgandi vi polleat, tamen ob peculiarem quorundam corporum temperiem atque idiosyncrasiam quandoque accidit, ut ab eius usu tanquam à Cathartico fortiori assumpto æger violenter expurgetur : In hoc casu omnino oportet ut *Laudanum* cum eo exhibeatur, quo minus hanc operationem, tam suæ naturæ quàm morbo planè contrariam ciere valeat.

Dicta Methodus usu mihi venit in cæteris Intermittentibus sive *Tertianis*, sive *Quotidianis*; utrasque enim statim à finito Paroxysmo aggreddior, & repetito per jam commemorata Paroxysmorum interstitia medicamine (quantum scilicet earum fert indoles) urgeo atque à tergo premo; hoc tamen discrimine quod cùm *Quartana* rarissimè nisi *Unciâ unâ* in doses dispertitâ, reliquæ

liquæ sex Drachmis possint ita expugnari, ut inducias saltem concedant.

At verò Tertianæ Quotidianæque, etsi post unum alterumve Paroxysmum omnino videantur intermittere, tamen non ita rarò (quod & à me antè est notatum) postea ad Continuarum fere speciem vergunt, & ad Remissionem tantùm, etiam diebus quæ Intermissionem pollebantur, accedunt: præsertim ubi æger lecto defixus regimine justo calidiore, aut medicamentis Febri per sudores ejiciendæ dicatis fuerit multatus. Hoc in casu à remissione quantumlibet exiguâ (id enim mihi unum superest) ansam arripens, pulverem quam proximè à Paroxysmo (quantum conjecturâ valeo) ingerendum propino, sesqui drachmam sc. exhibens sextâ quâque horâ ad vices quatuor; ne quidem ipsum

morans Paroxysmum, cùm aliter in spatio interjecto plus satis brevi alexeteria Corticis vis sanguini impertiri nequeat.

Cùm autem Febres quæ jam apud nos grassantur, etsi post secundum tertiumve paroxysmum reponere se in classem Continuarum nitantur, tamen ad Intermittentes debeant referri, nulla mihi est religio Corticem vel in maximè Continuis hujus speciei sumendum proponere, qui dicto more iteratus ad apyrexiam certò ægrum perducet, modò assiduus Lectuli calor, & intempestivus Cardiacorum usus continuitatem Febri non conciliaverint; quo in casu Peruvianum corticem nihil quicquam profecisse plus semel observavi. Neque mihi unquam contigit ut viderem Vinum in quo propinatur Cortex (quod jure quis possit suspicari) febricitanti obfuisse;

e

è contrà verò calor, fitis, cæteraque  
Febris Symptomata post assumptas  
Drachmas sex, vel quod earum ex-  
æquat virtutem in aliâ quâlibet for-  
mâ, mox evanescent, vino haud  
obstanti.

Cùm verò sint aliqui qui Corti-  
cem hunc nec in Pulveris formâ, nec  
Electuarii, nec tandem Pilularum  
ferre queant, his ejusdem infusum  
in frigido factum propino; ʒii sc.  
Corticis grossè pulverati in Vini  
Rhenani ʒvi aliquandiù macero. Li-  
quor hic per manicam Hippocratis  
sæpiusculè trajectus, colore limpi-  
dus adeò non officit, ut vel delica-  
tulum palato arrideat, ʒiiii dictæ  
Infusionis ad dies aliquot factæ vir-  
tutem ʒi Corticis in pulvere exhi-  
biti videntur continere. Quæ cùm  
nec ingrata sit, nec ventriculum pre-  
mat, duplo frequentius usurpari pote-  
rit, quàm reliquæ ejusdem remedii

formulae, nempe donec Paroxyfmi terga dederint.

Pro Infantibus quorum ætas tenella vel à Pulveris, vel Infusi in frigido facti eâ quantitate quâ devincatur morbus, periclitari possit, ʒii vel iii Corticis in vini Gallici Rubri ℥i decoquendas præcipio ad casum tertiæ partis, ac colaturæ cochleare unum alterumve bis terve de die pro ratione ætatis exhibendum curo, donec Paroxyfmi non ampliùs discrucient.

Observandum est insuper, quod cum breviora Paroxyfmorum interstitia in Tertianis & Quotidianis Intermittentibus non satis temporis concedant ad sanguinem febrifugâ Corticis virtute plenè exaturandum, fieri non potest ut æger proximum à prima medicatione Paroxyfimum, uti in Quartana solet evenire, certò effugere valeat, sed in his medica-

men-



mentum sæpe non nisi post biduum promissam curationem absolvet.

Animadvertendum autem quòd si æger, non obstante abundanti cautelâ superius tradita, nihilominus recidivam patiatur (quæ in Quartana ipsâ rariùs accidit, quàm in Tertianis vel Quotidianis) tamen prudentis Medici erit non nimiùm pertinaciter insistere methodo Corticis per dicta intervalla exhibendi, sed pro suo judicio aliis modis curationem aggredi; cui præ cæteris *Decoctum amarum*, quod appellant, mag-nopere conducere vulgò creditur.

Diætam quod spectat cæterumq; regimen, nec à cibo nec à potu arcendus est æger, qualis qualis is demum fuerit qui ad stomachum facit; Fructibus tamen horariis, & Liquoribus frigidis (utpote & infirmandæ sanguinis massæ & Febri postliminiò reducendæ admodum conferenti-

bus) semper exceptis. Vescatur itaque carnibus eupeptis & euchymis, & vino modicè utatur pro potu ordinario; quâ re solâ ægros nonnunquam restitui, etiam eos quorum corpora frequenti febris recursum communita salutiferam aliis corticis vim eludebant. Neque verò se temerè auræ frigidiori committere debet æger, donec sanguis pristinum vigorem de novo obtinuerit. Vitandæ autem ante omnia Evacuationes qualescunque, cum vel blandissima Catharsis, quinimò Enema è lacte Saccharato in morbi discrimen certissimè, fortè in morbum ipsum denuò ægrum conjiciet. Hæc habui de Peruviani Corticis usu summam dicenda: Neque enim Remediorum pompæ libuit indulgere: Cum sanè qui aliquid Cortici adjiciunt præter vehiculum eidem in ventriculum transmittendo necessarium,

rium, aut ex ignorantia peccant, ut mihi videtur, aut dolo malo, à quo Vir Probus ex animo abhorrebit; qui cum pars sit ejusdem communis naturæ, ut *ὁμοφύλῳ* fraudem faciat nullo unquam privato suo commodo poterit adduci.

Quod superest, si ætati placuisset ad ea animum advertere quæ annis abhinc quatuor in Historia Acutorum Morborum tradideram (quæ & ante illud tempus mihi innotuisse omninò est credibile) quo pacta sc. Cortex in interjectis paroxysmorom spatiis debuerit ministrari, tum postea repeti ægro jam convalescente, viverent fortassis haud pauci eorum quos jam terra tegit; ut ut homines vilipendant tennes sanè illos conatus nostros communi omnium bono dicatos, & monita spreverint ibidem dictata verbis insequentibus, quibus ea breviter continentur quæ hîc fusi.

fusiùs explicare visum est, viz.

Curandum est ante omnia ne præmatu-  
rè nimis hic Cortex ingeratur, ante sc.  
quàm morbus suo se Marte aliquantisper  
protriverit (nisi collabescentes & jam  
fractæ ægri vires eundem temporiùs su-  
mendum esse dictaverint) neque enim il-  
lud solum est metuendum ne à præproprio  
ejus usu inefficax iste reddatur & spem  
ægri fallat, sed etiam ne de ægri vitâ a-  
gatur, si sanguini omni fermentationis nisu  
se despumanti derepente injiciamus remo-  
ram. Proximo Loco, neque Catharsi,  
multò minùs Venæ-sectione, subducenda  
est materiæ Febrilis pars aliqua, quò li-  
beriùs cortex suo fungatur munere: cùm  
enim ab utrâque labefactetur quadante-  
nus œconomia corporis, eo promptiùs cer-  
tiùsque recrudescent Paroxysmi, evanes-  
cente semel pulveris vi. Mibi eti-  
am magis è re fore videtur ut sangui-  
nem dicto medicamine sensim longiore-  
que à Paroxysmis intervallo leviter infi-  
ciamus,

ciamus, quàm ut uno omnino ictu Paroxysmum jam instantem tentemus confodere; hoc enim pacto & plus temporis remedio conceditur quo suum opus plenius absolvat, & evitatur quicquid id est periculi quod ægro poterit oriri ex subito isto atque intempestivo nimis sufflamine, quo Paroxysmum jam invalescentem atque omni se ope exerentem conamur opprimere. Postremò brevibus istis temporis intervallis repetendus est Pulvis, ut non protinus evanescat prioris dosis virtus antequam altera exhibeatur: crebrâ enim repetitione istâ cūctia tandem recuperabitur, profligato in solidum morbo. His adductus rationibus hanc ego methodum cæteris antepono, Peruviani corticis ℥i. cum Syrup. Rosar. rub. ℥ii. misceatur; eger verò quantitatem Nucis moschatæ majoris mane & serò quotidie devoret diebus à genuino Paroxysmo vacuis, donec confectionem omnem absumpserit. Repe-  
tatur porrò ad tres alias vices interjectis  
semper

*semper diebus quatuordecim. Morb. Acut. Histor. Sect. 1. Cap. V.*

*Annus  
1679.*

Sequenti anno (nempè 1679.) sub initio Julii eadem Febres de novo vires redintegrabant, & quotidie increbrescentes mense Augusto quàm immanissime debacchabantur, ac magnam stragem edebant. Cùm autem de his jam fusiùs egi, nihil ampliùs adjiciam, nisi quòd *Novo Epidemico* à manifestâ aeris crasi pendenti sub mense Novembris prorsus locum cedebant.

Etenim unà cum *Novembri* subingrediebantur *Tusses* cæteris quos mihi contigit observare annis *ἐπιδημῶντες*, cùm in singulis ferè familiis universi laborarent. Harum aliæ opem medicam non magnoperè desiderabant; aliæ verò pulmones ità vehementer agitabant, ut æger ventriculi contenta per os ejicere subinde cogeretur, vertigine insuper cor-  
rep-

reptus, à nisu violentiori & laborioso. Primis ferè diebus Tussis, siccam æmulans, nullam materiam spectabilem exantlavit, mox ætate auctior nonnihil ; atque ut verbo expediam, tum in eo quòd parciùs expectorarent ægri, tum etiam conatu vehementiori, & paroxysmorum duratione ad *Tussim puerorum Convulsivam* mihi propiùs accedere videbatur, nisi quod mitiùs aliquantùm sæviret. In hoc saltem Convulsivam superabat, quòd & Febre, & solitis ejus symptomatis stipata ægrum invaderet, quæ in Tussi puerorum nondum me vidisse memini.

Solenne sit licèt Tusses sub Hyemis adventum affligere, mirabantur tamen omnes eas hoc anno ita præter solitum increbrescere : quod quidem hâc præcipuè de causâ arbitrator contigisse. Quùm mensis *Octobris* crebrioribus quàm solebat, & fer-

fermè continuis permaduisset imbribus, & sanguis hominum tempestati consentiens particulas crudas atque aquosas affatim imbibisset, transpiratione per cutis spiracula à primo frigoris insultu prohibitâ, Natura colluviem hanc serosam vel per ramos Venæ Arteriosæ, vel, quod alii volunt, Asperæ Arteriæ glandulas eliminare sategit, & tussis ope explodere.

Curatio ritè ut institueretur, quoties sc. Medico fuit opus, tam per Venæsectionem, quàm Catharsin evacuandum esse nullus dubitavi: Neque enim aliâ aliquâ methodo æquè commodè ejiciuntur redundantes feri particulæ ac per Phlebotomiam & Cathartica, quæ tam insigniter vasa emulgent. Remedia *Pectoralia* quod attinet, (præterquam quòd eorum usû gratificamur ægris) non intelligo quo pacto amoliendæ

Tussis



Tussis causæ queant conferre ; cum  
omnis eorum actio vel in incrassan-  
da materia , quoties justo tenuior  
vim expultricis facultatis eludit, vel  
in eadem attenuanda, quoties ob vis-  
ciditatem ægrius expuitur, poni vi-  
deatur. Id certò scio inutiliter in  
his tantum temporis impendi ; non-  
nunquam etiam sanguinis massam  
eò usque debilitari à retentis particu-  
lis feri naturæ inimicis, pulmonef-  
que insuper Tussi irritatos ita con-  
quassari motu violento ac ferè con-  
tinuo, ut non rarò via sternatur ad  
Tabem ; à cujus insidiis celeritate  
Curationis æger vindicari debuerat.  
Neque multo tutiùs adhibentur Su-  
dorifica, à quorum usu æger non-  
nunquam in Febrem incidit ; non-  
nunquam etiam particulæ sanguinis  
facile inflammabiles ita Pleuræ im-  
pinguntur ut accendatur Pleuresis,  
quod per decursum dictæ Tussis Epi-  
demi-

demicæ ingenti vi hominum cum suo magno periculo contigit.

Sanguinis itaque è brachio eduxi quantitatem moderatam; Epispasticum satis amplum ac forte posteriori cervici applicandum curavi, quo materiæ peccantis pars aliqua aliò derivari possit. Posthæc Catharticum è Lenioribus, Infusionem sc. *Sennæ*, *Rhei*, cum *Manna*, & *Syrup. Ros. Sol.* quotidie exhibui, donec vel prorsus convalesceret æger, vel admodum imminuerentur Symptomata. Vel, si Potio minùs ægro arrideret, *Pil. Coch. major* ðii. quotidie devorandos imperavi, horâ scilicet quintâ matutinâ superdormiendo.

Hâc etiam Methodo, Phlebotomiâ scilicet & repetitâ Catharsi, eâque solâ expugnatur *Tussis Puerorum Convulsiva*; malum aliàs pertinacissimum & penè insuperabile. Alii  
quid

quid valeant hîc præstare planè nescio, me in variis atque omnis ferè generis remediis operam non semel perdidisse satis scio. Sed leniora tantùm Cathartica hîc conveniunt, eaque cochleatim sunt ingerenda præ ratione ætatis. Quæ quidem *ἡμέτερος* evacuatio eo nomine, ut arbitror, dictæ Tussi medetur, quòd scilicet, licèt non multum humoris serosi in Pulmonibus inveniatur, fervidiores tamen & spirituosi Halitus è massa sanguinis in pulmones statim temporibus transmissi atrociores illos tussendi Paroxysmos in tenellis excitent. Horum autem in pulmones impetus haud aliâ methodo æquè sisti posse videtur & præcaveri, atque hâc quâ motus priori contrarius (per viscera scilicet) morbi causæ conciliatur.

Verùm in Morbis *Epidemicis* cu-  
juscunque demùm generis sint, (si  
modò recens adhuc ægrum corri-  
puerint) summopere cavendum ne  
alvus ei ducatur nisi misso priùs san-  
guine. Qui enim Morbi à Consti-  
tutione aeris *Epidemicâ* pendent,  
aut jam Febres sunt, aut in earum  
clâssẽ levissimâ de causâ transeunt;  
cum ex tumultu in sanguine & hu-  
moribus à Catharsi vel lenissimâ ex-  
citato, & subsequente calore facilè  
accendatur Febris, quam aliàs Na-  
tura propulsaſſet consuetis materiæ  
morbificæ evacuationibus; *Grave-*  
*dine* ex. gr. aut *Tussi* in hoc de quo  
jam agimus *Epidemico*; aut *Diar-*  
*rhæâ* quoties Febris cum illa faciens  
*epidemicè* grassatur. Idem potest  
dici de quacunque alia aeris Consti-  
tutione quâ corpus ad certum ali-  
quod Febris genus determinatur;  
quæ quidem non semper actu inva-  
dit,

dit, sed benignioris naturæ ductu, morbi fomes è sanguine, mediante evacuatione aliquâ ejus Genio accommodâ, exturbatur. Hoc constanter assero, quantumlibet mos jam obtineat exhibendi Cathartica ante celebratam Venæ-sectionem, vel quod adhuc est periculosius, eâ penitus omisâ. Licet enim objiciatur fæculentias in primis viis stabulantes toties in vacuas venas propelli, quoties detrahitur sanguis, alvo non prius subductâ, certissimum tamen est evacuationem quam isti præmitti volunt nullo modo resarcire posse injuriam sanguini illatam à tumultuante Cathartico Phlebotomiæ præmissa. Atque negari non potest Catharticum mox à dempto sanguine assumptum longè mitius vim suam exerere, neque perinde sanguinem vel calefacere vel exagitare, atque idem solet si Phlebotomiam

miam præcedat. Neque paucos, ex Infantibus maximè, vel ob ignoratam hanc rem, vel neglectam perisse existimo.

Atque hoc mihi suffragante experientiâ multiplici compertissimum est. Experientiâ inquam, optimâ duce & magistrâ : ad cujus leges & normam nisi exerceatur Medicina, eam prorsus exulare satiùs esset. Luditur enim, quod ajunt, de corio Humano plus satis, cùm hinc Empirici, neque Morborum historiam, nec Methodum medendi calientes, & Receptis tantùm freti; isthinc Sciorum vanissimi spem omnem in affectato Artis ambitu, & speculationibus utrinque pari ferè momento disceptatis ponentes, quasi junctis viribus majorem edunt stragem, quàm ederent morbi eorum destituti auxilio. Ea demum Praxis, eaque sola ægris mortalibus opem

pem feret, quæ Indicationes curativas ex ipsis morborum Phænomenis elicit, dein firmat experientia : Quibus gradibus magnus *Hippocrates* ad cœlum ascendit. Et si dictâ Methodo Ars Medica à quoquam traderetur, licet morbi unius aut alterius Curatio cuilibet è vulgo possit innotescere, integra tamen Ars quaquapatet homines prudentes & peritos etiam magis exquireret quàm in statu hodierno, neque vel minimum Artis honori exinde decederet : Cùm enim subtilitas longè accuratior in Naturæ operationibus (in quarum observatione verâ Praxis Medica fundatur) quàm in Arte aliquâ, Hypothesibus etiam luculentissimis suffultâ, inveniatur, medendi Ars quam præcipit Natura rude Vulgi ingenium longiori intervallo superabit, quàm ista quæ à Philosophia docetur. Fidem hîc mihi facient

*Febres*, quæ duas è tribus in Medicina facienda partes occupant, & quemvis mihi arbitrum constituo, vel mediocriter cogitationibus indulgere solitum, vera dicam necne. Quis enim vel ex insulsissimis Empiricis est qui se huic morbo curando imparem fatebitur, si id tantum agendum est ut duabus istis Indicationibus Curativis quæ vulgò obtinent fiat satis? Nempè ut Sudorificorum ope exterminetur materia morbum committens, & symptomaticis eatur obviam quæ ejusmodi evacuationibus superveniunt. Certissimus enim est, *Theriaca Andromachi*, *Pulv. è chelis Cancr. comp.* *Aq. Epidem.* &c. intrò assumptis, unâ cum regimine calidiori sudores posse propelli; quem sibi scopum unicè proposuit in hujus morbi curatione, maximè si fortè *Malignitatis* nomen auribus usurpaverit. Et ad mitiganda



ganda quod attinet symptomata, *Diacodium* in promptu est quo somnus invitetur, quoties urgeant Vigiliæ; *Enema* quoties alvus non respondeat, & sic de cæteris. At nec ipse valet comprehendere suo Marte, nec è Medicorum præscriptis ediscere, quæ demum illa sit Febris species quam debellare satagit; si modò credamus (credent saltem fortè Posterì) varias dari Februm species, quarum singulæ suam sibi methodum medendi à reliquis diversam ferè postulant; Unam insuper eandemque Febrem, cujuscunque sit generis, uno modo ubi primum aggreditur, atque alio paululum diverso per singulos gradus quo usque grassabitur tractandam esse. Quo pacto Indicationes Curativas ab hoc vel illo Phænomeno minùs insigni mutuabitur naturalem morbi Historiam ignorans (quæ sola ve-

ram medendi rationem indigitare poterit) cùm nequeat dijudicare an hoc vel aliud Phænomenon à Curandi quam adhibet Methodo, an ab ipso nascatur morbo? Dies deficeret enumerantem varia & subtiliora illa minutioraque quæ in hoc atque in aliis morbis curandis observanda occurrunt: quæ cùm tot sint & tanti momenti ad liberandos à morte homines, semper licebit Posteris & seris Nepotibus aliquid adjicere iis Observationibus, quibus traditur varietas penè infinita operationum naturæ in Morborum productione, & Curativæ Indicationes ex eo fonte depromendæ enumerantur. Non itaque vilescet Ars si quid hujusmodi lucem aspiciat, quin potius illustrabitur, & difficilior redita non nisi sapientes & subacti judicii viros in filiorum numerum cooptari finet. Sed hæc obiter.

*Tusses*

*Tusses* modò dictæ, si imperitè tractarentur, *Febrem* accendere solebant ei haud absimilem quæ Hyeme Anni 1675. adeò epidemicè grassabatur, & cujus historiam tradidi Sect. quintâ Cap. quinto libri nostri de *Morbis Acutis*. Sed cùm Febris hæc soboles tantùm esset ac effectus *Tussis Epidemicæ*, eâdem ipsâ methodo *Febrem*, felici semper cum successu, aggressus sum quam in *Tussis* curatione suprà descripsi; nempe *Venæ* sectione, *Epispastico* cervici appposito, & *Cathartico* deindè tribus auroris exhibito. Quamlibet enim in *Tussi* sine Febre nullum præfiniebatur tempus quamdiu æger purgandus esset (utpote quæ continuari deberet, ut suprà notavi, donec vel prorsus convalesceret, vel admodum imminuerentur symptomata) in Febre tamen quæ à *Tussi* pendeat, purgatio  
per

per tres dies instituta ei prorsus de-  
bellandæ parerat; quod in Consti-  
tutione de quâ jam agimus sæpius-  
culè observavi.

Hîc autem notatu occurrit, licet  
hanc Febrem, quando se primùm ex-  
erebat, comitarentur defluxiones in  
Pulmones molestissimæ, post men-  
sem tamen unum vel alterum, cùm  
colluvies ista seri sensim è sanguine  
eliminaretur, Febris ejusdem planè  
indolis hinc indè sine Tussi aliquâ in-  
festabat (non penitus deletâ, sed ma-  
nente adhuc in sanguine malæ Cra-  
sis impressione) ac proinde haud  
diversam Curationem ab ea quam  
Tussis comitabatur sibi vendicabat.  
Verùm eodem quem dixi modo  
hæc Febris se extendebat usque ad  
initium Anni 1680. quo hæc conscri-  
bo; quo tempore etiam cum anno  
surgente Febres Intermittentes modò  
dictæ apparere incipiunt.

Atque

Atque hæc fere sunt omnia, Vir plurimùm Honorande, quæ de morbis Epidemicis Annorum nuperri-  
mè elapsorum observavi. In *Rheumatismi* verò curatione (nam & de illo etiam morbo quærebas) sæpe-  
numero mihi subiit tecum dolere, quòd non nisi ingenti sanguinis vi repetitis venæ-sectionibus eductâ, ea possit perfici; unde non tantùm ægri vires pro tempore franguntur, sed si paulò fuerit naturâ debilior, aliis etiam morbis ad annos aliquot obnoxior ferè redditur; cùm post illos elapsos materia Rheumatismum prius committens jam in Pulmones depluat, ægro scilicet frigore perculso, vel aliâ aliquâ *εργασία* leviori diathesis latens in sanguine jam foràs in actum protruditur. His de causis experiri statui an ulla alia metho-  
dus daretur à reiteratâ toties Phlebotomiâ diversa, quâ hic morbus possit debel-

debellari. Serio itaque perpendens quòd affectus iste (uti jam pridem in *Acutorum Historia* subinnui) ab inflammatione videatur oriri, quod tum cætera arguunt Phænomena, tum præsertim sanguinis è pertusâ venâ color, ut pote qui Pleuritico- rum sanguini per omnia similis est, tandem vero simile esse judicabam morbum hunc Diætâ simplici, admodum refrigerante, & mediocriter nutriente ægro imperatâ, æquè feliciter atque repetitis Venæsectionibus profligari posse; etiam evitatis quæ alteri methodo adjungebantur incommodis: neque me fefellit Diæta è sero lactis Phlebotomiæ loco substituta.

Prægressâ æstate Pharmacopola mihi in viciniâ nomine *Malthus* (Vir probus & ingenio non vulgari) me accersebat. Rheumatismo autem miserè cruciabatur his sympto-  
matis

matitis stipato. Coxendice primò ad biduum claudicabat, exinde Pulmones dolore tentabantur gravativo cum dyspnœâ, quæ post aliud fermè biduum evanescebat; dein caput vehementer cœpit dolere, mox etiam coxendix dextri lateris, quæ omnium prima laborabat; posteaque, pro morbi indole, omnes ferè tam brachiorum quàm crurum articuli per vices molestabantur. Cùm debiliori esset & sicco corporis habitu, veritus ne minùs firmas jamdiu vires & labascentes dempto copiosius sanguine prorsus exolverem (maximè cum Æstas eo usque adoleverit ut jam metus esset ne superveniens Hyems redintegrandis viribus frequenti venæsectione attritis intercederet) imperavi ut solo lactis sero ad dies quatuor vesceretur æger, quibus elapsis præter serum lactis pro victu ordinario panem

panem similagineum concessi loco prandii, semel nempe in die donec penitus convalesceret. Tenui hâc Diætâ contentus, ad dies octodecim perseverabat, nisi quod postremis eorum alium insuper panem pro cœnâ indulgerem. Serum autem è Lactis libris octo domi paratum quotidie infumebat, quo satis benè nutriebatur. Post hos dies cùm non ampliùs urgerent symptomata, & jam sub dio versaretur, carnes etiam permisi, Pullorum scilicet elixorum, cæteraque *εὐμενῆα*. Tertiò autem quoque die solo lactis sero victitabat, donec tandem pancreaticè valeret; incommodis quæ supra memoravi hac methodo elusis, quibus decimo abhinc anno pessimè excipiebatur, Venæsectione ex meo præscripto in curationis subsidium tunc adhibitâ, ac sæpe repetitâ.

Siquis



Siquis hanc Methodum tanquam rudicorem & Artis laude carentem contempserit, sciat is velim, primò leviora tantùm ingenia res quaslibet vilipendere quòd simplices fuerint & apertæ; dein me, vel imminutæ existimationis pretio, publico hominum bono inservire paratissimum. Quibus edico quòd nisi obstarent præjudicia vulgi nullus dubitarem methodum jam dictam aliis etiam morbis, quorum impræsentiarum nomen reticere libet accommodare. Quod sanè magis ægris prodesset, quàm solennior illa remedium pompa, quæ in jam moribundis, tanquam Bestiis ut mox immolentur coronatis, malè collocatur.

Quod verò etiam ista quæ pro vilissimis habentur & nullius sunt pretii, accedente eâ quæ in Medico quæritur solertia & ἀγένοια, hominibus

nibus ab orci faucibus liberandis  
 queant inservire, exemplo docebo :  
 quod licet ad morbum de quo jam  
 agimus nihil pertineat, non tamen  
 profus est ἀπεροδίουσον, nec ab eo  
 quem mihi proposui scopo alienum.  
 Duobus abhinc mensibus quidam in  
 vicinia me rogabat ut servum invise-  
 rem qui haud modicam *Mercurii*  
*Sublimati Corrosivi* quantitatem de-  
 glutiverat, sive ignorans, sive, ut  
 postea audiui, ex amore μελαγχολῶν.  
 Hora ferè elapsa erat à qua vene-  
 num hauserat cùm ad eum accede-  
 rem, jamque os & labia valde in-  
 tumescebant, vehementer ægrotaba-  
 bat, ardente ventriculi dolore, ca-  
 loreque tantùm non confectus. Ego  
 tres Aquæ tepidæ Congios repetitis  
 haustibus summâ quâ potuit celeri-  
 tate & diligentia ebibendos impera-  
 vi ; atque ut toties nova ingeretur  
 copia, quoties ventriculus jam in-  
 gestam

gestam per vomitum ejecerat: volui etiam ut eluerentur intestina aquâ tepidâ sine ullo additamento copiosè per sedem injectâ, ubi primùm ventris tormina admonerent venenum jam per inferiora exitum quærere. Paruit miser, jam vitæ avidus, & plures etiam aquæ libras quàm præscripseram absorpsit. Amici qui ægro, ut pote in casu insolito, assiderent ab eo didicerunt, quas primùm evomuit aquas gustu perquam acres fuisse, sale scilicet venenato plenius exaturatas; singulis autem vicibus rejectas aliquam semper acredinis partem amittere, donec tandem nihil prorsus saperent. Quæ mox urgebant tormina, solâ aquâ injectâ ad modum Enematis leniebantur. Hoc tam nullo rerum apparatu, Benedicente Numine, intra paucas horas convaluit æger, nisi quòd labia non statim de-

tumescerent ; ore etiam à veneni particulis quæ aquam quam evomuerat penitiùs infecerant, adhuc exulcerato. Quæ symptomata Diætâ è lacte solo ad quatrimum adhibita mox evanuerunt. Aquam Oleo (quod hîc unâ cum opere ignari solent perdere) atque aliis omnibus liquoribus ideo prætuli, quòd cùm ea magis esuriret, exindè magis idonea mihi videretur devorandis salinis hujus veneni particulis, quàm alius quilibet liquor, qui vel crassior esset, vel particulis alieni corporis jamdiu prægnantior.

Sed ut ad *Rheumatismum* revertar. Utut è sero lactis Diætâ conveniat Juvenibus, atque iis qui temperatè & cùm consilio vixerunt, tamen inconsultum fuerit virilem ætatem prætergressos, vel vino ac aliis liquoribus spirituosus jam à longo tempore plus æquo addictos hâc me-

methodo tractare; ut pote quæ in hujusmodi hominibus ventriculum labefactet, & pariter præ inusitato frigore sanguini inducto viam sternat ad Hydropem. In hoc igitur casu omnino par est ut eo ferè modo quem Libri nostri *De morb. Acut.* Sect. vi. Cap. v. tradidi, curetur æger: Tametsi ex quo eum scripsi, experientiâ didicerim satius esse post secundam vel ad plurimum post tertiam Venæsectionem Cathartica sæpè sæpiùs exhibere atque repetere, donec symptomata omnia penitus cessaverint, quàm Phlebotomiæ rem totam committere. Etenim ob Catharsin suppetias ad everruncandum morbum Phlebotomiæ ferentem, citra ingentem istam sanguinis jacturam subsistere fas erit: atque porrò locus relinquetur *Paragoricis*, à quibus aliàs, ut ut sæviret dolor, ægro temperandum

dum esset, cùm illorum usu figatur morbus, neque tam facile Venæsectioni cedat. Purgativa verò ista è *Lenitivis* solùm consent, ut *Thamarindis*, *Sennâ*, *Rheo*, *Mannâ* & *Syr. Ros. Sol.* cùm alia quæ ex *Scammonio*, *Zalapio*, &c. parantur tumultum cieant & dolorem exasperent. At singulis vespertinis post peractam Catharsin *Syr. de meconio* 3i aliquantulum temporius quàm id fieri solet, propinetur.

Hic autem commemorare libet, me per constitutionem instantem observasse affectum quendam modò *Rheumatismum* æmulantem, modò etiam à *Nephritico dolore*, quoad sævissimum lumborum cruciatum, non multùm abludentem, qui cùm Febres Intermittentes excipere soleret, translationi materiæ febrilis in musculosas corporis partes originem suam debebat. Hoc symptoma haud diversam

sam medendi methodum postulabat ab illa quam morbus ipse cui adhæreret, Febris nempe Intermittens, sibi vendicabat; cum à frequenti Phlebotomia & quibuscunque aliis evacuationibus exasperaretur illud, atque æger in vitæ discrimen conjiceretur. Quod ut nemini imponat, id attingere volui.

Atque hæc sunt, Spectatissime Vir, quæ in his Affectibus de quibus sciscitari libuit, sedulâ observatione habeo comperta: quæ si aut tibi placuerint, aut profuerint aliis, mihi cedent ex animi sententiâ; me saltem pro tenuitate meâ debitum tuæ Claritati observantiæ specimen exhibere conatum mihi seriò gratulabor.

Tibi semper Addictissimus,

THO. SYDENHAM.

Londini,  
Febr. 7. 1672.





---

*Doctissimo Amicissimoq; Viro*  
 THOMÆ SYDENHAM, M.D.

**M**Agnum rei medicæ exortum est  
 & lumen, & commodum,  
*Vir Clarissime*, ex consummata  
 tuâ de Morbis Acutis historiâ, eâque  
 sedulâ observatione, & fidâ experienciâ  
 stabilitâ, non lucri aut fame aucupio  
 scriptâ, sed sincerâ fide, & mente ho-  
 nestâ; Cùm tibi amplum satis theatrum  
 sit officium fecisse, & præsentī seculo  
 quovis modo profuisse. Ipse hætenus  
 celavi penitus quod volui, at fortassè  
 quid jam parem tibi è longinquo subo-  
 let. Qui laudat quod facis, urget ut fa-  
 cias quòd adhuc laudetur. De morbis  
 Acutis scribere summa difficultas est, ut-  
 pote quos tam rapida volvit rota, ut nisi

opportuno sistatur sufflamine, in præceps ruat vita, nullis in posterum auxiliis, nullis suppetiis redimenda. Tu singula eorum momenta notas, & quid quovis temporis articulo fieri necesse sit. Opus quidem perfectum, & absolutum, cui nihil addi poterat, nisi majus promisseras, De Morbis scilicet Chronicis. Hi inducias ferent, & tutiores examinandi, & judicandi moras.

Sæpe nobis incidit sermo de propudio illo Morbi Venerei, cujus ignominiosam originem Gentes Europæ à se invicem sedulò satagunt propellere, & ut ejus magis adhuc occultentur vestigia ad ipsos Indos remotissimos amandant. Scortatorum audit flagellum, furiosæ, & indomitæ libidini aptissimè respondens pœna, eo fortassè fine tardiùs remota, ut tanti constet pœnitere. Et humanitatis, & peccati simul sensu tactus videbatur, qui palam optavit impurissimam hanc lucem semel tantùm curari posse. Cùm  
jam

jam autem ad agyrta, tonsores, & infimos quosque sciolos ejus sæpè devoluta sit curatio, illi aut fraude, aut imperitiâ magno eam sumptu, majori etiam molestiâ tam diu differunt, & protollunt, ut vitæ planè tædeat inter carnificum tormenta, & longissimas Medicinæ moras protractæ, & ferè levius sit egrotasse, quàm sanari. Jus igitur promissi, amicè tamen, exigo; præmittas oro, in arrhabonem reliquorum, si quid habes hâc in re confectum. Humaniter, & sincerè explices quâ methodo, quibus auxiliis hoc morbo captus se redimat quàm queat minimo. Satis est ut æger sub Deo, non etiam pejus sub Medico vapulet. Hoc gratum pluribus fiet, & ad me aliqualis saltem pars gloriæ redibit, utpote cujus precibus desideratissimum hoc opus in lucem dederis.

Tibi omni officio addictissimus,

H. PAMAN.

Ex Ædib. Lambeth.

Febr. 12. 16<sup>72</sup>/<sub>80</sub>.



---

*Ornatissimo Eruditissimoque Viro*

HENRICO PAMAN M. D.

*Divi Johannis Cantabrigiensis  
Socio, Academiæ Oratori Pub-  
lico, & in Collegio Greshamen-  
si apud Londinenses in Medi-  
cina Professori.*

**Q**uanquam eum quem de  
Acutis Morbis, Vir Spe-  
ctatissime, nuper edidi tra-  
ctatum, quæ est tua tam humanitas,  
quàm animi in me propensio, ceu  
opus undique consummatum de-  
prædicare digneris; usque adeò ta-  
men tenuitatis tùm meæ, tùm istius  
opellæ mihi sum conscius, ut me  
nihil

nihil aliud egisse existimem, quàm  
viam præmonstrasse, quâ qui ingenio  
magis valent, dictorum Morborum  
& Historiam & Curationem queant  
investigare.

——— *Fungor vice Cotis, acutum  
Reddere quæ ferrum valet, exors ipsa secandi.*

Et profectò ita multiplex, incer-  
ta, & delicata, ut ita dicam, est  
natura, atque ita ludit in his mor-  
bis producendis, ut unius non sit ho-  
minis, ut ut vivacis, varia eorum  
φαινόμενα & curationes iisdem accom-  
modatas graphicè depingere. Unum  
hominem dixi? quid quod vel de-  
cem quidem homines per tot sæcu-  
la sibi invicem succenturiati, atque  
iisdem tum maximâ ingenii vi, tum  
indefessâ industriâ præditi, tum eti-  
am in Praxi, quæ numerosas obser-  
vationes suppeditaret versatissimi,  
perpulchre hîc operam suam collo-  
care

care possint! Tantum abest ut ad  
Artem Medicam vel pervenerim  
ipse, vel me putem pervenisse.

*Mecum habito, & novi quàm sit mihi  
curta supellex.*

*Morbos istos Chronicos quod attinet,  
quorum Historiæ perscribendæ spem  
tibi feceram, ita penitus animo meo  
insedit ejus rei studium, ut non tam  
aliâ de causâ, si bene me novi, vi-  
tam mihi prorogari exoptem, quàm  
ut istiusmodi aliquo conamine com-  
muni hominum utilitati inserviam :  
At verò singuli me dies docent  
quàm sit arduum coeptum id, &  
quàm periculosæ plenum aleæ (mi-  
hi præ cæteris qui isto ingenii acu-  
mine atque solertia, quibus hîc est  
opus, non satis valeo) cùm apud  
Scriptores rei Medicæ (Divinum  
*Hippocratem* si demas, atque alios  
pau-*

paucissimos numero) vix ulla deprehendi queant vestigia, quibus adjutus per rerum avia spinis & sentibus impedita iter faciam; cùm quæ promittunt subsidia Authores & lumina ostentant magis Ignis Fatui sint, quàm veræ faces, & in salebras potiùs ac præcipitia sequentem agant, quàm mentem fideliter & rectâ dirigant in genuinâ naturæ Methodo indagandâ atque inveniendâ: utpote quorum scripta ferè omnia Hypothesibus innituntur, quas peperit lascivientis ingenii & Phantasiæ luxuria; ipsaque adeò Morborum Phænomena (in quibus eorundem Historia vertitur) prout ab iis describuntur, ex eâdem Hypothesew officinâ prodeunt; quin & ipsa Praxis quâ Morbos aggrediuntur (quod humani generis Pestis est certissima & pernicies) ad hujusmodi Postulata componitur, non ad rei veri-



veritatem. Usque adeò grassantur, & regnant ferè in singulis paginis Cerebroforum hominum commenta, jacent interim naturæ judicia. Quibus non obstantibus, si vitam Deus atque otium concesserit, experiar fortassis aliquando quid valeant humeri. Impræsentiarum, ut animum agnoscas in tui obsequia paratissimum, en tibi offero, ceu ejus quod molior operis specimen, dissertationem hanc, brevem illam quidem de Lue Venereâ, & quam solam adhuc prælo adornavi.

Primùm autem id attingere volo, me haud paucos convenisse, qui si-ve præ studio, honesto quidem eo, incontinentiores à peccato coercendi metu insecuturæ pœnæ, si-ve ut Castimonix laudem sibi arrogarent, non dubitabant asserere *Luis Venereæ* Curationem docendam non esse. His ego non assentior; utpote  
qui

qui existimem nullum ferè locum Charitati atque operæ mutuæ relictum iri, nisi ea quæ sibi suâ ipsorum culpâ improvidi accersunt mala, humaniorum officiis sarciantur. Omnipotentis Dei est fontes castigare, nostrum verò miseris pro virili succurrere, atque ægris opem ferre; non autem curiosâ causarum indagatione illos acriùs urgere, aut censorio vexare fastu. Tradam itaque quæ in hoc morbo observavi atque expertus sum; non quò hominum animos deteriores efficiam, sed ut corpora (quòd mihi negotii datum est) reddam saniora.

*Luis venereæ  
Historia.*

*Lues Venerea ex India primùm Occidentali An. Dom. 1493. Europam appulit; cùm ante id tempus ne quidem nomine tenus, quantum scire licet, nostro orbi innotuerit: Undè etiam Morbus vulgò censetur iis tractibus America Endemius in quos*

quos nos primi Colonias deduximus. Mihi verò potius è regione aliquâ *Nigritarum Guineæ* conterminorum originem traxisse videtur; cùm à plurimis nostratium, iisque fide dignis, qui *Insulas Caribes* dictas incolunt, didicerim, mancipia recens à *Guineâ* allata, etiam antequam in terram descenderint, tum alia ibidem degentia hoc morbo tentari, nullâ copulâ impurâ prægressâ; ita ut non rarò universam aliquam eorum familiam, viros scilicet mulieres, liberosque malè mulctet. Neque ista Lues quæ afflictissimos hosce sæpe sæpius invadit, vel hilum à *Venereâ* nobis dictâ, quantum ego quidem intelligo, quoad symptomata, Dolores scilicet, Ulcera, &c. habitâ nempè diversorum Climatorum ratione, videtur discrepare, licet nomine prorsus abludat, cùm *The Yaws* ab illis dicatur. At nec

medendi methodus quâ utuntur illi, à nostrâ abhorret, utrobique enim *Salivatio* ex *Hydrargyro* utramque facit paginam : non obstante eo quod hîc apud nos dicitur de eximiâ *Guaici* & *Sarsaparillæ* vi quam in natali solo exerant, quæ ex longo ad nos itinere tantum non exhausta putatur. Probabile itaque mihi videtur *Hispanos* qui in Europam primi hunc morbum traduxere, eodem infectos fuisse ex contagio *Nigrorum* emptorum in *Africa*, quorum genti alicui (multi enim sunt populi *Guineæ* confines apud quos invaluit mos ille barbarus homines Europæis mercibus permutandi) *Endemius* esse potest. Ut ut sit, contagiosa ista Lues paulatim serpens, has orbis terrarum partes eo usque inquinavit, ut si eâ celeritate grassaretur adhuc quâ primum invasit, intra sæcula aliquot actum esset de genere humano, vel

sal-

saltem Nofocomiis de cætero addi-  
ctum, prorsus impar esset iis rebus  
gerendis quibus continetur homi-  
num societas : nisi quòd, Vegetabi-  
lium instar, in alienum à patrio so-  
lum quasi transplantata, Europæo  
nostro non perinde lætatur, sed lan-  
guet indies, & mitioribus Phæno-  
menis fatiscit. Novus apud nos  
hospes cùm esset, si quem arripue-  
rat, mox omnem sanguinis mas-  
sam contaminabat, & diris capitis  
atque artuum doloribus, tum etiam  
ulceribus variis in partibus se pro-  
debat. At verò Centum retrò an-  
nis *Gonorrhææ Virulentæ* specie se pri-  
mùm ostendebat, ostenditque ad-  
huc, hâc sibi portâ exitum quærens;  
nullo alio manifesto symptomate,  
nisi quòd in perpaucis ulcusculum  
in pudendo (vulgò à *Shanker*) pri-  
mum morbi est indicium; cujus vi-  
rus cùm per *Gonorrhæam* non eji-

G 2

ciatur,

ciatur, sanguinis massam dicto citius pervadit inficitque.

Propagatur autem Venerea hæc Lues vel per *generationem*, undè misellus Infans ab inquinato parentum altero mala ducit stamina vitæ; vel per *contactum mollioris alicujus partis*, quo virulentia atque inflammatio corpori insinuantur ex occasionibus hoc in loco dicendis. Primò in lactatione v. gr. vel Infans Nutricem per rariores mamillarum poros, vel Nutrix Infantem per os tenerum inficere potest. Secundò Infantes si nudi cum inquinatis in eodem lecto dormiant. Licet enim Adulti quorum caro jam firmior ætate obduru- it, vix nisi intercedente impuro coitu, quamvis simul dormiant, possint infici, Infantium tamen laxior caro & texturæ rarioris venenum facile excipit, quod non semel observavi Infantibus à genitoribus, quibuscum

buscum dormiebant, infectis contigisse. Tertiò autem, partis mollioris contactus maximè in Coitu impuro fit, ac proinde eo præ cæteris modo serpit Lues: cùm scilicet penis Spiritibus Generationi dicatis turgidus, à Venereo sive ulcere, sive etiam pustulâ in uteri vagina stabulante noxam de facili haurit; quorum alterutro intus latente Mulier nihilominus sana videri potest; veneno nempe vel istarum partium illuvie ita detento ut segniùs invadat sanguinem, vel per menstruas purgationes diluto sæpius, & quadante-nus exterminato. Contagio hæc carnosam virgæ substantiam, quantum ego judico, primum adoritur, quam quidem corrumpens, eidem-que primò inflammationem, mox ulcerosam *διὰ δεσιν* sensim inducens, efficit ut sanies, qualem in Gonorrhæâ cernimus, in urethram lentè

extillet: quod ut credam hâc ratione promoveor; ipse scilicet vidi virulentam hujusmodi materiam per substantiam glandis porosam exudare, non per urethram ejectam, nulloque ulcere vel glandem occupante, vel præputium. Tandem verò altiùs penetrans, glandulas *Prostratas* efferato ulcere solet depascere; quod haud rarò cernitur in eorum cadaveribus quos hic morbus è medio sustulit.

Gradibus mox dicendis procedit hic morbus. Æger, (ocyùs aut seriùs, prout mulier quâcum consuevit magis minùsve fuerit inquinata, pro ratione etiam temperaturæ *μασθηπ* excipiendo magis minùsve idoneæ) primùm dolore genitalium insolito cruciatur cum quâdam rotatione quasi testiculorum; postea, si recutitus non sit, macula primò Morbillum jam erumpentem magnitu-



nitudine & colore æmulans glandis partem aliquam invadit. Statim ab hujus maculæ exortu, liquor quidam lentè extillat, seminis instar, qui quotidie à seminis tam colore, quàm consistentiâ recedens, flavescit tandem aliquanto dilutiùs ovi vitello; & in Lue Virulentiori intensioreque non modò virescit, sed & aqueo humori permiscetur sanguine affatim tincto. Pustula jam dicta ulcus tandem fit, primò haud absimile Aphthis Infantum ora obsidentibus, quod indies latius & profundius depascitur, supervenientibus orificii callo & duritie. Animadvertendum est autem quod memorata pustula rarò Gonorrhæam comitem habet in iis qui aut jam pridem Gonorrhæâ laborarunt, aut recutiti sunt; utpote quorum Glans tum ab aere cui exposita est, tum à frequenti linteorum attritu

indurescens, noxam non ita facile suscipit. Hujusmodi verpi igitur glandis ulcere ferè non tentantur, sola Gonorrhæa dicto modo nascitur atque augetur. Hanc alia mox symptomata excipiunt, ut primò magnus doloris sensus in pene quoties erigitur, perinde ac si validâ manu transversus fortiter constringeretur, qui noctu præcipue urget, quoties in lecto æger cœpit incallescere: quam quidem constrictionem penis dolorificam morbi hujus in hoc statu existentis signum *παδυνωργικότητα* existimo. Incurvatur etiam veretrum à fræno jam contractiore, quod cùm in erectione extenditur pro natura sua, acutissimum dolorem adfert. Accedit etiam ardor urinæ, qui plerumque inter mingendum vix percipitur, at vero æger jam à mictu cessans per omnem urethræ ductum acriter admodum uritur,

uritur, maxime quâ in glandem definit. Nonnunquam etiam erosâ atque excoriatâ urethrâ jugi puris acrioris fluxu, natura in carne novâ vice jam deperditæ justo occupatior laxam quandam & spongiosam substituit, quæ mole quotidie aucta & sensim indurata, *Caruncularum* excrescentiis ita meatum urinarium infert, ut tandem lotio non detur exitus; quæ quidem carunculæ nihilominus ex ulceribus sibi adnatis ichorem quandam evomunt, & tum Medico crucem figunt inter curandum, tum ægro magis ipsâ morte timendum malum. Quinimò sæpe accidit ut sanies quæ per Gonorrhæam deplenda erat, vel à motu violentiori, vel Astringentium usu in scrotum deposita, atrocissimum dolorem & Scroti inflammationem accersat, nunc alterutro, nunc utroque ejus latere in molem ingentem elato;  
Go-

Gonorrhæa interim progreditur tardiùs, at verò urinæ ardor non mitiùs urget. Atque hæc sunt communiora morbi hujus symptomata, manente hoc ejus statu.

At verò quoties sive Morbi diuturnitate & in dictis partibus morâ contagio sursum fertur & sensim sanguini labem imprimit, aut materiâ virulentâ indebito Adstringentium usu in corpore retentâ humores putrescunt, *vera Lues* exoritur, in quâ Tumores sive *Bubones* sæpe in inguine comparentes primum ejus gradum constituunt. Dolores tum caput, tum artus in articulorum interstitiis, humeros scilicet, brachia, & talos crudeliter laniunt, nullo ordine invadentes, & per intervalla, licet noctu ægrum lectuli calore perfusum rarissimè destituant, nec nisi sub auroram libenter evanescant. Crustulæ etiam & porrigines varias

cor-

corporis partes deturpant. Flavescunt hæ fermè ad instar favi, quo signo à cæteris omnibus queant internosci. Quandoque superficie latiore varia occupant corporis spatia ad eum modum quo *Lepra* in Medicorum scriptis depingitur. Quanto autem magis scabies hæc diffunditur, tanto minùs æger discruciat. Univerfa symptomata pedetentim inrudescunt, dolor præ reliquis, qui tandem eo usque exacerbatur ut se nequeat miser diutiùs in lecto continere, sed protinus exiliens, huc illuc in cubiculo cursitet irrequietus fermè donec illucescat. Adde quod præ doloris vehementiâ Cranium atque ossa tibiæ brachiorumque hinc inde attolluntur in perdura tubera, *Exostoses* dicta, excrescentiæ ossæ in equorum tibiis (vulgò à *Spavin*) haud absimilia: quæ quidem ossa tuberculis obsessa jugi dolore

lore ac inflammatione tandem cariosa redduntur & putrescunt. Ulcera etiam Phagedænica varias corporis partes depopulantur, quæ fauces ut plurimum primò aggredientia, sensim per palatum in nasi cartilaginem propagantur, quam mox absumunt, ita ut is jam fulcro destitutus planè concidat. Crescentibus indies ulceribus & dolore aucto, æger partim indefinente carnificinâ enectus, partim ulceribus confectus & putredine vitam trahit cruciatu, fæto, carie, opprobrio molestissimam, & quavis morte longo intervallo miseriores, donec tandem, pereuntibus per vices membris, læcerum cadaver, & jam superis grave, humo condatur.

Intrinsicam hujus morbi naturam, Essentialem quam vocant, nisi quatenus ea ex istis quæ jam depinximus symptomatis elucescit, non mihi

mihi magis perspectam esse arbitror, quàm est Essentia sive Plantæ cujuslibet, sive Animalis: Quicquid verò de eâ sit, certò mihi constat humorem hunc committentem inflammationis haud mediocris participem esse, undè hæc tot malorum Ilias: constat etiam dictum humorem evacuandum esse, idque iis mediis quorum efficacix Experientia, medicorum Magistra, suffragatur. Cùm nondum invenitur immediatum aliquod *Specificum* cujus ope sine evacuatione prægressâ Lues debellari queat. Neque enim vel *Mercurius*, vel *Ligna Exsiccantia* dicta, Specificorum titulo sunt donanda, nisi exemplis in medium allatis probare quis possit, vel Mercurium absque Salivatione, vel Lignorum Decoctum nullo subsequente sudore Luis Venereæ curationem quandoque absolvisse.

Utque

Utque experienciâ didici sudorifica  
vulgaria haud minùs profecisse in  
hoc morbo quàm Lignorum deco-  
ctum, ita nullus dubito quin si repe-  
riri possit aliud quid, sive in Regno  
Vegetabili, sive Animali, quod in  
excitandâ salivatione pares cum  
Mercurio vires haberet, pariter eti-  
am ad sanandam Luem valeret.  
Quandoquidem autem hic morbus  
adhuc intra Gonorrhææ limites sub-  
sistens, longè ab eodem distat cum  
jam omnem sanguinis massam con-  
taminayerit, & Venereæ Luis no-  
men præcisè mereatur, ita etiam E-  
vacuatio quâ Gonorrhææ materia  
ejicitur, alia prorsus est atque illa,  
quâ Lues jam formata eliminanda  
est.

*Gonor-  
rhææ vi-  
rulente  
Curatio.*

*Gonorrhæam* itaque quod attinet,  
de quâ primò agemus, in remediis  
Catharticis, quantum huc usque usu  
comperimus, Curationis omnis car-  
do



do vertitur; quorum auxilio vel educitur humor peccans, vel procuratur diversio succorum corporis naturalium qui aliter hosti in pabulum cederent. Quamvis autem tum ratio, tum experientia mihi dictant hunc morbum à quolibet demum Cathartico sæpe diuque exhibito sanatum iri, ea tamen cæteris *degestione* ~~ea~~ mihi videntur quæ bilem, maxime verò quæ ichorem ferosum fortiter è sanguine expurgant & subducunt. Ac proinde solâ *Jalapii radice* pauperibus aliquoties subveni, quorum tenuitati & rebus domi angustis consulendum erat. Cùm verò & morbus conspicuam secum trahat inflammationem, & medicamenta purgantia quibus expugnandus is est, calida etiam sint, Diæta refrigerans omnino est imperanda à carceribus, quod dicitur, ad metas. Sic itaque soleo præscribere. & *mass. Pilul. cochiar.*  
*maj.*

*maj. 3iii Extract. Rudii 3i resin. Jalap. diagryd. an. 3ß cum f. q. Opobalsami f. Pil. è singulis Drachm. vi.* Quatuor ex his singulis auroris deglutiendæ sunt horâ quartâ vel quintâ (ita ut æger superdormiat) ad dies 12. vel 14. vel etiam plures, donec sc. urinæ odor & materiæ seminiformis color flavus admodum imminuantur; quæ cum pro voto successerint, satis esse autumo, si æger interjecto semper die uno, easdem repetat ad septimanas adhuc duas; quo tempore elapso, sufficit ut bis in septimana sumantur Pilulæ, donec humor ex urethrâ stillare solitus prorsus evanescat, quod ut plurimum non nisi post multos dies contingit. Quamvis enim vulgò affirmetur, quod ejusmodi ichor, qui ardore urinæ & flavo materiæ extillantis colore disparentibus manè præsertim in summitate colis digitis compressi ad guttulam unam alteramve

ramve cernitur, à debilitate tantum & à laxitate partium ob diutinam virosi fomitis in eis moram oriatur, miseri tamen experiuntur magno suo malo reliquias has esse contagii non penitus deleti; quod licet quadtantenus subactum, ex levissimâ quâque occasione (à potu scilicet nimio, aut exercitio quolibet vehementiori, aut simili aliâ) novas excitat tragœdias, Gonorrhæâ postliminiò recrudescente, si nempè æger catharseôs molestiam defugerit, nondum extirpato radicitus morbo.

Si post hujusmodi purgationem Gonorrhæa nondum cedat, ex usu erit loco Pilularum, maxime in iis qui difficilius purgantur, potentius aliquod medicamentum subinde intercalare, cujusmodi est Potio sequens, quæ semel tantum hausta magis aliquando fecit ad sistendam Gonorrhæam, quàm leniora Cathar-

thartica sæpenumerò ingesta. *Tamarind.* 3<sup>ss</sup> *fol. sen.* 3ii *Rhei* 3i<sup>ss</sup> *Coq. s. q.* *aq. Colaturæ* 3iii *dissolv.* *Mannæ, syr. Rosar. solut. an.* 3i *syr. de spinâ cervin.* & *Electuar.* è *succo Rosar. an.* 3ii. Vel detur *Turbith minerale ad gr. viii.* tantum bis vel ter, (idque interposito debito temporis spatio, ne fortè oboriatur Ptyalismus) quod quidem remedium in eradicandâ Gonorrhæâ pervicaciori facile primas fert.

Est autem ubi æger à Catharsi dicto modo repetitâ usq; adeò abhorret, ut ne conspectum quidem, vel odorem solum remediorum ferre queat; est etiam ubi corpus ex ἰδιουρηνία quadam ita pertinaciter purgantibus refragatur, ut debita peccantis humoris quantitas nequeat educi, atque ita dum impensius in hoc laboratur nullo cum fructu, Lues tandem obrepit, quæ eos sæpissimè ægròs adoritur, quorum corpora cathartici-

for-

fortiùs obsistunt; cùm ita se res habeat, *Enematis* agendum est, quibus injectis utrique indicationi, humoris scilicet tum expurgandi, tum ab affectâ parte derivandi satis fieri potest. Quinetiam hæc Methodus expeditior est nonnunquam præmemoratâ istâ, at non æque tuta, me judice; cùm prior illa licet diuturnitate molestior, minùs tamen habeat periculi nequa contagiosi fomitibus particula in visceribus hæreat novos datura tumultus; Hoc verò incommodum facillimè evitatur, si Cathartica per os assumpta diebus ab usu Clysterum liberis, mutuam iis operam commodent.

Hâc itaq; viâ incedo, Pilulas jam prædictas, aut alias ejusmodi duabus tribusve auroris continuis exhibendas curo; postea Enema sequens manè, & horâ quintâ pomeridianâ quotidie injiciendum, donec penitùs cessaverint

rint symptomata; nisi quod semel aut bis in hebdomade Catharticum impero, misso die isto Clystere. *R. Electuar. è succo Rosar. vi. Terebinth. Venet. vitello ovi solut. 3<sup>ss</sup>. dissolvantur in aq. Hordei <sup>libi</sup>. Colaturæ adde Syr. Violac. 3ii m. f. Enema: Singulis etiam noctibus Opobalsami vel Balsami è Mecha gut. xxv. sacchari frustulo exceptas concedo, sub lecti ingressu; quod quidem medicamentum, cum *Terebinthinæ* quoddam genus sit liquidum ac purum, iisdem quibus illa facultatibus pollet, & ulcerosæ genitalium diathesi apprimè succurrit; hujus itaque defectu *Terebinthina Cypria* ad quantitatem avellanæ dictis temporibus devoranda substitui possit.*

Procedente Curatione, quâcunque ea demum methodo tentetur, ægro cibis omnibus sale conditis, vel aliàs dyspeptis (quales sunt carnes

Bovi-

Bovinæ, Porcinæ, Pisces, Caseus, Radices, Olera) & fructibus horariis quibuscunque interdico; quibus substituo carnem Vervecinam, Vitulinam, Pullorum, Cuniculorum, & cætera *ἐμπειρία*. Volo etiam ut vel his parcissimè utatur, tantum ut ægri vires non labascant. Potus, vino in genere abdicato, ut & liquore omni sive spirituofo, sive acescente, *Hydrogala* esto, ex tribus aquæ coctæ partibus & lactis unâ: nisi quod in prandio & coenâ Cerevisia tenuis in parvâ quantitate possit indulgeri. Ad contemperandam insuper inflammationem, & mitigandum ardorem urinæ, refrigerantem aliquam *Emulsionem* ad sequentis normam compono, in Purgationum interstitio frequenter potandam. R. Sem. Melon. Pepon. an. ʒβ. sem. Papav. albi ʒii. Amygdal. dulc. excorticat. n. viii. contund. simul in mor-

*tario marmoreo, sensim affundendo aq. Hord. <sup>thi</sup>ß. Colaturæ adde sacchari Cry-  
stallini q. s. m. f. s. a. Emulsio.*

In temperamento admodum sanguineo, & affectu pertinaciore, post mensem catharsi datum, aut circiter, ut plurimum sanguinis Uncias octo vel novem è brachio dextro detrahendas suadeo ; ut maturius celebretur venæsectio author non sum, ne hâc *νεκροτομή* contagium penitus inferatur. *Injectiones* in urethram non magni facio, utpote quæ sive acrimoniâ suâ mordaci, sive stipticitate non rarò magis officere soleant, quàm prodesse : veruntamen sub morbi exitu *Aqua Rosacea* in pauca quantitate potest injici.

Hâc methodo, quæ mihi semper pro voto cessit in Gonorrhœâ sanandâ, meliorem nondum comperi ; maximè in iis qui facilè purgantur.

In



In iis enim qui purgantur ægriùs, curatio, licèt nunquam fallax, tamen non nisi post longum temporis spatium perficitur. In his itaque acuenda sunt Cathartica, tum etiam repetenda sæpiùs, atque in eorum usu diutiùs est perseverandum, aut Clysteres modo jam signato usurpandi. Etenim Catharsis hîc ad instar omnium est. Atque in hoc affectu, si in alio quopiam, verè asseritur, quòd qui mundificat bene, bene sanat : modò ab *Aquis Mineralibus* sibi temperet, quas certò mihi constat morbi reliquias è corpore eliminandas vi astringente & plus satis sanativâ arctiùs constringere, & quasi clavo figere trabali; unde quòd sæpius observavi, Scroti tumores enascebantur quoties in morbi principio, vel statu, pejoraque adhuc symptomata ut Carunculæ, &c. si quando sub ejus exitu pota-

rentur. Quod quidem ego fidenter assero, quantumlibet ex more hodiè recepto Aquæ Minerales in dicto casu haud rarò præscribantur.

Neque sum nescius quantum se venditent Practicorum nonnulli in hujus symptomatis curatione, quâ brevioris temporis spatio, quâ remedijs magni nominis & tituli absolvendâ; interim observatione plus satis frequenti certò deprehendi, materiam, quæ eliminanda fuit, astringentium vi in corpore detentam maximum ægris dedisse malum: ex quo persæpe sanguinis massam de novo subiens ipsam demum Luem parit. Nec majore cum fructu, licèt periculo minore, decoctum *Lignorum exiccantium* usurpatum comperi; quo scilicet sub prætextu *Specificorum*, tum universum ægri corpus, tum præ cæteris affecta pars jampridem nimis incalescentia, ulterius

teriùs adhuc inflammabantur; nonnunquam etiam Gonorrhæa quæ paulò antè evanuerat, quod me observasse memini, denuò in conspectu prodiit.

Animadvertendum est autem quòd si ægri glans Præputio undique contegatur, atque ejusdem ora præ inflammatione usque adeò tumida, dura, ac callosa reddantur ut nullo modo queat reduci, laterem lavat quisquis Gonorrhæam remediis purgantibus, fortissimis licèt, & quotidie ad nauseam repetitis, aggredditur, nisi eodem tempore id agatur ut pars ita affecta ad statum sibi naturalem redeat, sublati & duritie & tumore, undè Gonorrhæa novus utique fomes subministratur. Quod quidem ego admolior *Fotu* sequente. *R. Rad. Althææ, & liliorum an. ʒiʒ. fol. Malv. Verbasc. Sambuc. & Hyoscyam. flor. Chamæmel.*

& Melilot. an. M.i. sem. lini, & Fæ-  
 nugræci an. 3ß. Coq. f. q. aq. font.  
 ut f. Fotus parti affectæ admo-  
 vendus per horæ unius spatium bis vel  
 ter in die. Peraçtâ fomentatione  
 partem affectam Oleo è semine lini  
 recenter extracto perungendam cu-  
 ro, deinde *Emplastrum* è *Mucilaginibus*  
 alutæ agninæ inductum labiis præ-  
 putii tumidis circumponendum.  
 Quòd si Ulcus vel in ipsius præputii  
 labiis, vel in subjectâ glande hærens  
 suâ callositate facit ut illud non nisi  
 ægrè possit retrahi, præter fotum  
 jam dictum sequens etiam *Linimentum*  
 præscribo. R. *Unguent. Basili-*  
*lici* 3vi. *Unguent. è Nicotianâ* 3ii. *Præ-*  
*cipitat. aq. Ros. lot. & optimè lavigat.*  
*3ß. m. f. Linimentum,* quo linteï ra-  
 sura imbuatur, & ulcusculo admo-  
 veatur semper post Fotûs præscripti  
 usum.

Ubi verò sive quòd justò maturi-  
ùs Gonorrhæa sistatur, sive ab exer-  
citio vehementiori, aut aliâ quâcun-  
que de causâ, Scrotum jam morbi  
sedes ab eadem in tumorem insigni-  
orem attollitur, prædictum Fotum  
bis in die parti affectæ admoveo,  
modò non imminuantur & dolor &  
tumor *Cataplasmate* vulgò noto ex  
*Oxycrato & farinâ Fabarum*. Hæc  
dum foràs peraguntur, non desino re-  
mediis & Catharticis, & Refrige-  
rantibus introsumptis, tum etiam  
Diætâ supradictâ hostem urgere;  
neque mihi religio est quovis mor-  
bi tempore sanguinis 3ix vel x è  
brachio isto detrahare quod testiculo  
tumefacto respondet, si tumoris mag-  
nitude & vehementia doloris id mi-  
hi suadeant. Atque hæc hæctenus  
de *Gonorrhæâ*.

*Luis con-  
firmate  
Curatio.*

Cùm verò eousque invaluerit morbus, ut jam *Venerea Lues*, vel *Lues confirmata* præcisè dici mereatur, alia omnino porta quærenda est, & duriori huic nodo cuneus itidem durior est adhibendus: quandoquidem nullum adhuc experimentum, quod sciam, adferri possit extirpati hujusce morbi, nisi per *Salivationem* ab *Hydrargyro* excitam: quicquid tam doctorum nonnulli, quàm indoctorum de aliis sanandi modis satis temerè & audacter effutiverint. Cùm itaque *Salivatio* omnem hîc numerum absolvat, id tantum mihi incumbit ut quæ in eâ tum excitandâ, tum etiam regendâ, & ratio (qualis qualis ea demum fuerit) & observatio rationi suffragata mihi dictaverint, edisseram.

In principio autem ne conjecturâ quidem assequi possum quid sibi velint crebra ista monita quibus de

cor-

corpore remediis Catharticis, & Digredientibus, Balneo puta & cæteris id genus, ritè præparando, ita seriò cavetur: Ut de Venæsectione jam taceam, cui nonnulli hîc loci primas deferunt. Quum enim si veritati sit litandum, eo res redigatur ut *Veneno* Salivatio procuranda sit (neque enim adhuc innotescit salubre aliquod medicamentum quo possit excitari, neque æger sine ejus ope in tuto collocari potest) quæritur utrùm corpori constantibus adhuc viribus vegeto & valenti, ac proindè frangendis inimici conatibus haud impari; an eidem missione sanguinis & tenui diætâ jam debilitato rectiùs committatur Venenum. Haud dubiè satius esse duxerit æquus rerum æstimator nihil agere, quàm ita importunè satagendo nocere. Quid quod experientia testatur, nullis evacuationibus, aut alio modo  
infr-

infirmatos salivationis impetum multò melius sustinere, quàm eos quorum quasi ante prælum incisi sunt nervi?

Missò itaque damnofo omni huiusmodi præludio, statim atque accersor *Unguentum* præscribo ex *Axungia Porcinæ* ʒii, & *Mercurii crudi* ʒi. Neque oleum aliquod è calidioribus, neque aliud quid admisceo; cùm deterius fiat *Unguentum*, si quod adjecta ista frænum injiciant, & nihilo efficacius, si nihil prorsus agant: Et fortasse additamenta ejusmodi sub nomine *Correctivorum*, idem hîc præstant, si quid tamen præstant, quod Catharticis adjuncta, judice experienciâ, solent præstare; tormina nempe excitant, & catharsin reddunt laboriosiore, à luctâ scilicet inter Antidotum & Catharticum, cujus vis omnis purgans in eo posita est quòd naturæ hominis inimicetur. Verùm ut tertiâ parte dicti

cti



eti Unguenti brachia crura & tibias ad tres noctes continuas (primam quâ accersor includendo) manibus suis æger perungat injungo; ita tamen ut neque axillas, neque inguina attingat uspiam, & abdomen panno laneo tenuiore circumposito & posteriùs confuto, à linimenti contactu diligenter muniat. Aurorâ illâ quæ postremam inunctionem proximè insequitur exhibeo gr. viii. *Turbith. mineralis in conservâ Rosarum rubrarum.* Post tertiam inunctionem, vel saltem post assumptum Turbith Minerale, gingivæ ut plurimùm intumescunt, & Ptyalismus suboritur: id jam medico negotii tantùm est ut gradum salivationis scrupulosè expendat, nè invocatis temerè suppetiis, salivationem eo usque evehat ut æger de vita periclitetur. Ubi jam Ptyalismus statum debitum fuerit adeptus (in quo expu-

untur

untur ut plurimùm libræ quatuor  
 spatio Nycthemeri) vel symptoma-  
 ta, etiamsi parciùs expuat æger, e-  
 vanuerint (quod plerumque contin-  
 git post quartam diem à statu saliva-  
 tionis) & indusium & tori lintea a-  
 liis, quæ à quo ultimo lavabantur  
 usurpata aliquandiu fuere, sunt per-  
 mutanda : cùm priora ista ungento  
 infecta salivationem & magis quàm  
 erat opus intendere, & longiùs pro-  
 trahere quàm ægro expediat, apta  
 nata sint. Quod si fortè priùs elan-  
 guescat salivatio quàm symptomata  
 penitus disparuerint, extimulanda  
 subinde est *Mercurio dulci* ad Æi pro  
 dosi exhibito.

Nonnunquam accidit, præser-  
 tim in corporibus *ευμεταβλήτοις*, quòd  
 post unam vel alteram inunctionem  
 (nempè simul ac Hydrargyro san-  
 guis affici inceperit) natura illicò  
 per intestina hunc hostem expellere  
 sata-

fatagat, undè non solùm dejectiones mucosæ & tormina ventris, ut in iis qui dysenteriâ laborant, eveniunt, verùm etiam curatio morbi impeditur, utpote qui salivationi tantummodò cedere soleat. In hoc casu à Mercurio sive extrà applicito, sive intrà assumpto, prorsus abstinentum, donec hæc Symptomata penitùs evanuerint; quæ ut faciliùs amoveantur utile erit ut *Diascordii* sesqui-drachmam æger aliquoties devoret, atque porrò ut *Corroborantium* ex *Cephalicis* & id genus aliis, vino Hispanico coctorum vaporem recipiat in fellâ perforatâ.

Convalescente de cæteris ægro, nisi quod os adhuc exulceretur (qui genuinus est ptyalismi fructus) salivatio quæ jam indies imminuitur, nec purgatione, nec alio modo quocunque sistenda est: fieri enim potest ut etiam post consopitum dolo-

I

rem,

rem, atque exiccata ulcera aliquid de morbi fomite adhuc in corpore deliteſcat, bella denūo moturum, niſi ſibi permittatur ſputatio illa moderata, quæ poſtquam redintegratâ ſanitate homo ſe auræ liberiori aliquandiu expoſuerit, deſitura eſt. Periculofum itaq; eſſe arbitror Ptyaliſmi jam abiturientis & mox evanituri reliquias vel *Catharſi* deducere, vel *Lignorum decocto* exiccare vel-  
le; à quâ Praxi, quæ vulgò obtinet ſpecie vel Mercurii è corpore eliminandi, vel corrigendæ ejus malignitatis, naſcuntur ſine dubio frequentes iſtæ *Recidivæ* quæ miſeris accidunt, ſanitatē tandem aliquando poſt tantum impenſarum, tot exantlatos labores, tantum tædii devoratum anhelantibus; ad quam etiam certò perveniſſent, ſi ſalivatio non niſi ſuo tempore determinaretur. Longiùs itaque conſultius eſſet, pty-  
aliſ-

alissimum promovere *Mercurio dulci* semel in hebdomade exhibito, etiam postquam omninò convaluerit & jam sub dio versetur, quàm eundem præmaturiùs inhibere.

Quantumlibet autem à catharsi in salivationis declinatione ob jam dictas causas abhorream, fieri tamen potest ut in ejusdem statu ea nec prætermitti possit, nec debeat, quoties scilicet re malè gestâ, eousque fuerit evecta salivatio ut jam ægri vitæ metuatur: quo in casu non tutum modò est, sed & necessarium etiam Cathartico ingesto ptyalissimum ad eum gradum deprimere, ut cum ægri *εὐφορία* procedat, qui deindè suo juri relinquendus.

Si quis jam quærat an nudâ Salivatione contenti esse debeamus, nec Catharticis, nec aliis remediis solennibus in usum, post eam peractam, revocatis? Respondeo, præter jam

dicta, quibus & ratio astipulatur, & experientia, me velle doceri quam ob causam magis sit necessarium purgare post Salivationem, quàm Salivationem excitare post Catharsin, cùm remedia purgantia (*Scammoniata* maximè & id genus acria) malignitatis quidpiam in corpore relinquant, quod naturæ tamen committimus, cujus vi tandem subjugatur istud quicquid est veneni, eo scilicet qui purgatus fuit ad regimen consuetum, exercitium, & liberio-rem aeris usum se recipiente. Atque id porro libenter scire velim, quâ demùm arte freti Mercurii reliquias per Catharsin expellere conamur, cùm genuinam illam ac propè unicam methodum (per salivationem scilicet) quâ natura id efficere solet ac debet, non solum negligamus, sed etiam impediamus? Hujusmodi autem hallucina-  
tio-

tiones minimis istis rationis scintillulis imputandæ sunt, quibus nos miseri mortales tantum præditi, ad veritatem in profundo demersam non penetrantes, quamlibet ejus umbram & speciem amplectimur, pro Junone, quod ajunt, captantes nubem; mox colloquia miscentes, præjudicia malè fundata ita penitus nobis invicem infigimus, ut tandem phantasmata nostra & delirantium insomnia pro principiis Apodicticis haberi velimus; cujus specimen, ni fallor, præ manibus nobis est.

Quamvis autem in plerisque Curatio modo jam dicto absolvatur, viz. *Inunctione* per tres noctes continuas, & exhibito *Turbith Minerali* aurorâ istâ quæ postremam excipit, *Mercurio* item *dulci* ad vices aliquot, Ptyalismo fatiscente; seriò tamen animadvertendum est in quibusdam reperiri idiosyncrasiam

sive temperamentum quoddam peculiare tam salivationis respectu, quàm purgationis (atque eadem plerumque in iisdem, ut qui ægre purgantur, ægrè etiam ad ptyalissimum perducuntur) ita ut in nonnullis Methodus laudata vix gingivarum exulcerationem queat efficere, multò minùs salivationem eam procurare quæ malo eradicando par sit. In hujusmodi ægris Medico summopere cavendum est ne animo nimium obstinato salivationem importuniùs urgeat, recalcitrante naturâ, atque ab isto evacuationis genere prorsus abhorrente; quod qui minùs intellexere ægros haud paucos letho dederunt: Etenim in corporibus ita factis, quotiescunque medicamenta sive externa illa fuerint, sive interna pertinaciter ingeminaveris, loco salivationis perfectæ nil præter ventris tormina, & de-



dejectiones dysentericas obtinebis, naturâ per hanc portam Hydrargyri virus amoliente; vel dolores ventriculi & ægritudines, sudores frigidos, horrendaque alia symptomata accerles, ita ut æger tantum non agat animam, fortè etiam mox eam evomat. In his licèt medico concedi possit, ut postquam ad dies quatuor vel quinque à postremâ inunctione salivationem frustra præstolatus fuerit, inunctionem jam sæpè dictam, & Turbith Minerale denuò repetat (interjectis inter singulas inunctionum vices diebus aliquot) religiosè tamen cavere debet, nè cùm tanto conamine salivationem incassum sollicitaverit, eam per vim invitæ naturæ extorquere pergat. Hic itaque modus, quantum ego iudicio valeo, Medico tenendus est, ut ubi primùm vel ægritudo ventriculi, vel ventris tormina succedant, statim

sibi temperet à remediis adhibendis donec ea penitus evanuerint sympto-  
mata; pluribus enim & fortioribus remediis ad cogendam *φύσεως ἀντι-  
περὶτρεῖς* salivationem accumulatis,  
Dysenteria certò certius tormina  
ventris, & ventriculi ægritudinem  
Mors excipiet. Cùm ex adverso si  
lentè festinet, & moras trahat, *Mer-  
curii dulcis* ʒi semel aut bis in sep-  
timanâ exhibendo, vel per se, vel  
cum ʒi *Diascordii*, si æger in Diar-  
rhœam propensior sit, tandem ali-  
quando cum bonis ægri rebus opta-  
tâ potietur arenâ. Quantumvis e-  
nim ptyalismus ad plenum nun-  
quam assurget, æger tamen copiosi-  
us quàm pro more solito expuet, &  
fœtor justæ salivationis comes neq;  
imminutiorem hanc destituet: unde  
evincitur sanguinem & humores  
eam sive putrefactionem, sive alte-  
rationem, quæcunque ea demum  
sit,

fit, attigisse, quæ vel parit salivationem, vel cum ea nascitur. Atque hâc Methodo universa hujus morbi symptomata tandem expugnabis, concesso utique debito temporis spatio.

Observandum est autem, quod licet salivatio remedia alia, qualiacunque ea fuerint, in extirpandâ *Lue confirmatâ* longè exuperet, *Gonorrhæam* tamen cum *Lue* concurrentem neutiquam valet sanare; nec sistetur illa, hâc jam penitus devictâ: unde rectè colligitur nullam vim specificam Mercurio inesse quâ Venerea Lues immediatè debellari possit: quamlibet *Specificum mediatum* fortè dici mereatur, in quantum mediante ptyalismo morbum expellat: pari fermè *καταρρηξήσιν* (quod aliàs subinnui) atque Scalpellum Chirurgicum Laterali morbo Specificum queat appellari. Sed ut ad rem

rem redeam. Quoties Lues & Gonorrhæa unâ stabulantur, vel ante Salivationem, vel eâ jam peractâ, Gonorrhææ curatio tentanda est; quod & tutius fit, me iudice, & facilius etiam post finitam salivationem, cùm Luem habens comitem Gonorrhæa ægrius dometur; quæ verò à prægressâ salivatione quadantenus subacta fuit, minori negotio expugnari soleat. At verò Catharticis religiosè abstinendum est quousque vel minimæ salivationis reliquæ supersint; Quamobrem *Turbith Minerali* semel aut bis in hebdomade exhibito securius rem commitemus, quàm aliis Purgantibus quibuscumque, cujus vi promovebitur aliquantulum ptyalismus, dum interim materia Gonorrhæam committens paulatim excernatur.

*Os exulceratum*, Salivationem passis ita familiare, si vel æger dolori  
feren-

ferendo par non fit, vel eo usque illud excorietur, quod sæpe fit, ut sanguine diffuat, nocte dieque vel aquâ Rosarum Damascenarum vel lacte aquæ permisto, vel hordei, radic. *Althææ*, & semin. *Cydoniorum* decocto sæpissimè proluendum est. Unicum hoc symptoma memorabile, quod scio, salivationi accidit, saltem quoties ea more debito administratur; & sanè si dolor & oris exulceratio arte aliquâ protelari potuerint, haud multo esset molestior morbi hujus curatio, quàm est aliorum aliquot longè minùs famigeratorum.

*Dietam* quod spectat & reliquum ægri regimen, eadem prorsus in *Salivatione*, saltem donec ad finem jam ferè vergat, ac in *Catharsi* imperanda censeo: Cùmque ei qui medicamentum aliquod purgans assumpsit, id tantum incumbat ut se  
in

in cubiculo à vi frigoris defendat, & cibis *cum modis* moderatè vescatur, nondum mihi constat quo nomine vel lecto semper addicatur qui Ptyalismum subit, vel à victu modico arceatur, qui scilicet naturæ cum veneno conflictanti vires animumq; addat: unde etiam naturâ tanto oneri succumbente, haud pauci, spiritibus atque omni vitæ robore diaphoresi, purgationibus, & jejuniis supervacuis (præter vulnus ab *Hydrargyro* inflictum) tandem penitus exhaustis, miserè confecti sunt: Persæpè etiam morbo jam pulso, æger eâ spirituum copiâ quâ erat opus ad redintegrandam sanitatem destitutus, præ imbecillitate concidit: aut si fortè *Libitinam* valeat effugere, tot tantisque cruciatibus vitam redimit, ut tanti non sit vivere. De quibus Poeta è Neotericis haud ineleganter.

*Graviora morbis patimur remedia ;  
Nec vita tanti est, vivere ut possis, mori.*

Hic autem in promptu est istam objectionem diluere, quâ fit ut nonnulli hoc morbo, (scilicet in statu ejus modò dicto) malè multati in *Galliam* commigrare cogantur ut ab eo liberentur? Cujus rei hanc esse rationem, quantum judicare possum, existimo; Hujusmodi ægris, œconomiâ illorum corporum ever-sâ ac viribus prostratis, apud nos aer crassus ac humidus refarciendis minùs idoneus est, cùm iste Gallix, utpotè qui salubrior ac magis seren-us, spiritus corporis & vires de-perditas instaurare aptus sit: Non quòd Practici ibidem degentes, ut ut docti quidem, methodum quâ hic morbus devinci possit, meliùs cal-lent, quàm nos hîc in *Angliâ*. Sed ut ad *Dixtam* revertar.

Ex-

Existimo itaque (& experientia mecum facit) quòd præter jusculum Avenaceum, Panatellam, Lac cerevisiatum, & Cerevisiam tenuem tepesactam, &c. juscula insuper è carne Vitulinâ, Pullorum, atque alia ejusmodi in mediocri quantitate ægro & possint concedi, & debeant; atque ut, ubi primùm eo usque subsederit gingivarum tumor, ut dentes conferere valeat, Cuniculorum, Pullorum, Agnorum carnes, atque ejusmodi teneriores, at parcâ manu, sint indulgendæ; ut vel in lecto se contineat, vel ad ignem sedeat, prout hoc vel illud magis allubescat animo: Cùm enim Ptyalismo expugnetur hîc morbus, non Diaphoresi, hariolando non sum quorsum æger, nullâ urgente necessitate, nimio calore mactetur.

Dicta Methodus uti expeditior est, cùm neque tot dies corpori ante  
fali-



salivationem præparando inutiliter infumendos, nec frequentes istas purgationes, aut decocta solennia post salivationem, ægris imponat; ita certissimus sum eandem longe faciliorem esse, minùs itidem periculofam, & minùs recidivæ obnoxiam: quod experimento suo discet quisquis in alterâ praxi versatus, ad hanc se demum conferet. Mihi saltem ex animi sententiâ successit in quàm plurimis ægris; quorum nonnulli salivationis tædium & laborem plus semel irritò conatu exantlaverant, recidivam semper denuò passi, ex occasionibus, & propter causas quas supra memoravimus. Non est autem, Vir Candidissime, cur tuam fidem verborum ambagibus anxie sollicitem, qui jamdudum de probitate meâ persuasissimus, existimationi etiam nostræ favere dignaris.

Plura de hoc morbo non addo, cum mihi neutiquam placeat, nec placebit unquam, longis verborum ambagibus & sermonibus ἀπεροδίωνος nucleum involvere, quo rei caput, seu *Nili* fons, ægrius innotescat. Quantulicunque autem sit hoc opusculum sive pretii, sive molis, id ut boni consulas rogo: Cum illud eo præcipuè fine elaboraverim, ut & in bonum publicum cederet, & quo in te essem animo palàm testarer: quantumlibet autem magni te faciam, major tamen adhuc tibi honos debetur & à me, & ab iis quibus summa illa tua eruditio, morum suavitas, animique candor, cæteræq; virtutes laude dignissimæ ita clarè elucescunt. Haud equidem tibi assentor, quoties profiteor me tuam amicitiam, ex quo me primùm eâ condecorabas, inter illa quæ mihi comparavi pretiosissima luculentissimæq;

sem-

semper habuisse. Inter alia enim in brevi vitæ curriculo à me observata eximium est istud, (quod etiam filio meo commendatissimum esse volo) hominum sc. probitate cæterisque virtutibus præcellentium consuetudinem semper mihi commodo vertisse atque emolumento; atque ex adverso pravorum amicitiam (nisi ea potius, combinatio, sive etiam conjuratio dicenda sit, quæ in virtute non fundatur) quamvis nec dictu, nec vultu quidem me læserint unquam, tamen nescio quo pacto, tandem aliquando aut mihi, aut rebus meis mali, aut damni quippiam affricasse. Vale, Vir Humanissime, & amare perge

Tui semper Observantissimum

THO. SYDENHAM.

Londini,  
Mart. 10. 16<sup>72</sup>/<sub>80</sub>.

F I N I S.

THE  
JOURNAL  
OF  
THE  
AMERICAN  
MEDICAL  
ASSOCIATION  
PUBLISHED WEEKLY  
CHICAGO, ILL., U.S.A.  
Vol. 10, No. 1, Jan. 1, 1917  
Price, Five Cents  
Subscription Price, \$5.00 per Annum in Advance  
Entered as Second-Class Matter, May 26, 1902  
Postpaid  
Acceptance for mailing at special rate of postage provided for in Act of October 3, 1917  
Authorized by Act of October 3, 1917  
Copyright, 1917, by American Medical Association  
Printed at the American Medical Association, 535 North Dearborn Street, Chicago, Ill.

Published by the  
AMERICAN MEDICAL ASSOCIATION  
535 North Dearborn Street, Chicago, Ill.  
Subscription Department

---

---

*Errata Typographica Lector sic corriget.*

**P**Ag. 9: Lin. 10. Lege cum. p. 41. l. 13. pacto, l. 14. Pa-  
roxysmorum, p. 54. l. 6. insulsissimis, p. 98. l. 1. R  
Thamarind. p. 103. l. 21. pejoraque, p. 106. l. 18. lot.

---

---